

Yuesuyal Sul

Arbosobo Yuesuyal Leil Miardal A,
Jianaxr Su Ca Mel Leil Bei Leixl Gger Lol

1 ¹ Yihexrhuaxr leil visser su Moxrxi si ho a, Yihexrhuaxr Moxrxi leil beijjiu su Nexl ddei ssor Yuesuyal leil bbeix: ² “Ngo leil visser su Moxrxi si ho a; eilcar ni ngier du lei a, cassor-worssor maelmaerjjia dax cirgo a Yuedaxl lazzarmo eil zex leil gger a, ngo Yirsaexllixl su ca mel leil gger middei ddei dax ssi nia. ³ Ha nia citaka ddei toxl ggie middei hazza, ngo, ngo Moxrxi dax bbeix har zaxr goxr ddar mel dax zox dae a, nia leil gger ho a. ⁴ Nia li wo dae middei ddei mel, naxrfa piar a gga hierbolpae dax cirdae a, baexrfa piar a gga Lixrbanexl mermi worga mel dax zzeze ci. Dofa piar a gga Yoxl-faladir lazzarmo dax cirdae a, Hexl su ca mel ddei middei mel leil gger a, xifa piar a gga Dixlzo neixvi dax zzeze ci. ⁵ Ni gol dae nixixl mel gga, ni leil bei leixl gger xie su ca ar ddei nr zza. Ngo Moxrxi dax arsae hher dax dae mel, ni dax lei arsae hher dax dae nia; ngo arsae bei lei ni dax bbe nr kae, ni leil piar pixl nr gger. ⁶ Ni arsae bei lei cassor-worssor eilmel leil middei hal ddei li wo lol var, hherdder ngo yaa porpor mel dax bbeix har zaxr a, yaa leil gger bbeix goxr middei ddei nga a; yel ni hhel nia, nixmox vaer nia! ⁷ Ni hhelhhelmo, nimox vaervaermo, ngo leil visser su Moxrxi miardal dae lixfaxr mel dax bei mae dae lalssa; vael piar a gga, bbeixsael yo piar a gga baelbaelsi bei ssi nr ddo. Eine nga a mel, ni dder azo bei lei bei nr cexr ar yoxr nr zza. ⁸ Ni meir gga arddolcar a lei, lixfaxr sul eil ddei zza nia; merxixl-merni lei cirleixr nr nor xiar nia; yel ni dder seilseir a bei mae dae cexr a. Eine nga a, ni bei dae mel bei cexr var; cirza-hanga bei a lei bei seir. ⁹ Ni arddolmaex ssi ci zzorbbeixlei, ni ddei Arbosobo Yihexrhuaxr arsae bei lei ni dax hher dax dae. Yel ni ngo miardal dae mel leil holcir dae nia: hhel nia, nixmox vaer nia! Gexr nr ssa, zzilzzil-zzerzzer zza nr ssa.”

Yuesuyal Lazzarmo Leil Gger Niazzir Dae A

¹⁰ Yel, Yuesuyal cassor-worssor mel leil guaxr su vaervaerpor mel leil miardal a bbeix: ¹¹ “Nia Yirsaexllixl su ca mel hher ggie cirmaexhanga ssi jiax a, cassor-worssor mel leil miardal a bbeix: ‘Zzor labox bei har zaxr nia; so ni ddei gga nia mel Yuedaxl lazzarmo eil zex leil gger a, nia ddei Arbosobo Yihexrhuaxr ni leil gger middei ddei gga ddir a, middei hal ddei li wo nia,’ eine bbeix.”

¹² Yuesuyal Liurbixl ddei cuxr gga ca mel leil, Jiadaexr ddei cuxr gga ca mel leil nei Marnaxrsi ddei cuxr gga ca cir peix leil bbeix: ¹³ “Nia Yihexrhuaxr leil visser su Moxrxi nia leil miardal dae ddar mel leil holcir dae nia. Moxrxi bbeix: ‘Nia ddei Arbosobo Yihexrhuaxr middei eil ddei nia leil gger a, nia leil zzasoso a goxr dae lol nia.’ ¹⁴ Nia ddei maerssor, aniux nei zzeir mel lei Yuedaxl lazzarmo dofa piar a gga, Moxrxi nia leil gger dae middei eil ddei gga hher dae cexr; nael nia ca mel gga zzi deil sexrsexr maelmaerjjia lei zaxl-ddaexr labox vei dae a, nia ddei arzzi-nimar mel xilmeir leil gger a, yaa leil beijjiu ssi nia, ¹⁵ Yihexrhuaxr nia ddei arzzi-nimar mel leil nia sael a zzaso lol, yaa lei nia ddei Arbosobo Yihexrhuaxr yaa leil gger middei ddei leil li wo hane ci a saelnei, nia, nia li wo middei eil ddei gga jjixr ddo. Middei eil ddei mel Yihexrhuaxr leil visser su Moxrxi Yuedaxl lazzarmo dofa piar a gga cirdae a, merni ddux lei ggie zzezze nia leil gger dae middei ddei nga a.” ¹⁶ Yaa Yuesuyal leil ddarkoxl a bbeix: “Ni ngua leil miardal a bei lol mel, ngua dder arsae bei lei bei; ni ngua leil miardal a ssi lol ggie, ngua dder arsae bei lei ssi. ¹⁷ Ngua halleix Moxrxi ddei ddar arsae noni mel, eilcar lei ni ddei ddar arsae noni; ni ddei Arbosobo Yihexrhuaxr Moxrxi dax hher dax dae mel sael a, ni dax hher dax dae lol nia. ¹⁸ Ha arseir ni miardal dae mel dax bei nr mae, ni yar leil miardal dae ddar hazza leil no-nr-ni a mel, yar leil dder bei zil gger nia; ni nixmox vaervaermo bei dae a dder ddo a!” eine bbeix a.

Yilixlge Zzi Leil Ker I Ssi

2¹ Nexl ddei ssor Yuesuyal Sixtixr mermi ca nnel miardal a, ar-jjiuljjiu a ker i ssi su bei lol, yaa leil miardal a bbeix: “Nia middei hal ddei leil nei Yilixlge zzi ddei leil ker i ssi.” Yel yaa nnel dder ssi a, ggecir vurler su ssormaer Lahexr mi hal hhexr ake ssi ci a dder halmaex xixl dae a. ² Ca mel Yilixlge zzi gga ddei zzirmar ddei leil bbeix gger a bbeix: “Eilmei Yirsaexllixl su ca ar mel a eilmaex lei ci a, middei eil ddei leil ker i lei.” ³ Yilixlge zzirmar ddei ca leil miardal a, Lahexr dax halmaex ssi lol a bbeix: “Ni dax eilmaex lei a, ni ake ddir lei su ca hal mel leil jia teixl lei nia. Yaa mel middei maelmaerjjia leil ker i lei.” ⁴ Lahexr mel ca eil nnel leil hier dae a kerzi du lei a; nael yar zzael bbeix: “Ca hal mel yarzi ngo dax eilmaex lei a; yaa arddolmaex lei nael ngo nr saexl. ⁵ Yaa neixmar niazzir dae a, zzi gielmi alddur ddei ggabil xilmeir leil dder ssi jixr a; arddolmaex ssi nael ngo nr saexl. Nia nialngasael ggaxrmae ssi a dder ggaxrmae wo ddo,” eine bbeix a. ⁶ (Ssormaer ddei xilmeir dder yaa leil hier dae a xipaebbor ddeix a, yaa leil yar halmaex dol dae bexlze mel gga kerzi du lei.) ⁷ Ca hal mel dder Yuedaxl lazzarmo leil gger ggie jjiumo zex gga yaa leil ggaxrmae ssi jixr a. Yaa leil ggaxrmae ssi su ca mel ddux ho a qie, ca mel dder zzi gielmi alddur ddei ggabil a.

⁸ Yaa nnel halae nr yixr seir, ssormaer ddei dder xipaebbor ddeix a, yaa dax halmaex ssi ci a, ⁹ yaa leil bbeix: “Yihexrhuaxr mel middei eil ddei nia leil gger ho a ngo saexl, yel ngua nia leil gexr zildu a; eilmaex gga hher dae ca maelmaerjjia lei ceirceir-laexlaex gexr mal a. ¹⁰ Nia Aezixr goxrjia gga ddux lei car, Yihexrhuaxr arsaе nia xilmeir neixvi nilni gga ajjix mel hie lol, hallae nia arsaе Yuedaxl lazzarmo dofa piar a ddei Yaxlmoxrlixl zzirmar Xihoxr nei Exl, yaa nnel leil bei zil gger ggie ngua bbejjiur a. ¹¹ Nia ddei Arbosobo Yihexrhuaxr mel merlabbor-middurbbor ddei Arbosobo ddei nga a; yel ngua eilmel leil bbejjiur a dder gexr a, nixmox zzar lei ssurssulssur zza. ¹² Eilcar nia leil qiuxr, Yihexrhuaxr leil dor dae a ngo dax bbeix har zaxr la, ngo lei nia leil seir lol a mel, nia lei eilmel sael a ngua hhexr leil seir lol nia, halae ngo leil ddarzziddo hoxltexr ar

ddei gger nia. ¹³ Ngabbor ngama, ngo ddei arzzi-nimar arzzi-nimo nei yaa ddei ca hazza leil jiuxl nia, ngua leil olga jiuxl a nr si lol.”

¹⁴ Yaa nnel yar leil bbeix: “Ni ngua bei dae mel ca leil nr saexl lol arddeirnga a, ngua dder ni leil ddarkoxl. Yihexrhuaxr ngua leil middei eil ddei li wo lol car, ngua arsae bei lei ni leil seir lol,” eine bbeix a.

¹⁵ Lahexr ddei xi ddei mel zzi weixrqiaxr ddei leil zi deix dae, yar lei zzi weixrqiaxr ddei leil goxr dae. Yel yar baezo sser a, ca hal nernel leil cuaho peixl gga diux zeii gger a. ¹⁶ Yar yaa nnel leil bbeix: “Nia wordabbor ssi nia; nrnga a, nia leil ggaxrmae ssi su ca mel nia dax zzi leilei. Nia halmaex gga so ni pahher a, nia leil ggaxrmae ssi su ca mel jjixr lei ho a saelnei ssi ddo.” ¹⁷ Yaa yar leil bbeix: “Ni eine bei nia. Nrnga a, ni ngua leil bbeix har zaxr dae lol mel dder ngua dax guaxr-nr-zoxr a. ¹⁸ Ngua middei eil ddei gga ssi ci car, ni baezo nilni eil zex ngua leil diux zeii gger ggie cuaho peixl ddei leil neixl gex dae nia. Halae niabbor niama, ni ddei arzzi-nimar nei niabbor yaa cirhexr-lorbba leil nia ake gga hher pex dae lol nia. ¹⁹ Ha arseir nia ake gga ddux a, zzijiul gga ssi dae a, yar leil seixl zil gger arddeirnga a mel dder yar ddei zuixl ddei arsae bei lei armael oldde leil ddeix, ngua dax guaxr-nr-zoxr a. Ha nia ake gga hher dae ca mel, arseir yar leil seixl arddeirnga a, yar leil sirnilni ddux lol zuixl ddei ngua oldde leil ddeix lol ddo. ²⁰ Nael, ni ngua bei dae mel si leil saexl lol arddeirnga a, ni ngua leil ni dax bbeix har zaxr lol mel dder ngua dax guaxr-nr-zoxr a.” ²¹ Ssormaer ddei bbeix: “Nia bbeix dae ddar mel dax zox dae a bei ddo a!” eine bbeix a. Yel dder yaa leil ssi lol a. Yaa ssi ho a, yar dder baezo nilni zex cuaho peixl leil neixl gex dae a.

²² Yaa nnel wordabbor ssi ci a, halmaex so ni pahher a, xia dae a, yaa leil ggaxrmae lei su ca mel leil jjixr lol. Yaa leil ggaxrmae lei su ca mel jjiumo cir zex gga yaa leil zo, nael zo wo nr xie a dder jjixr a. ²³ Yel yaa nnel dder wordabbor zeii jjixr lei a, lazzarmo leil gger a, Nexl ddei ssor Yuesuyal dax halmaex jjixr a, yaa pex dae mel yar leil biar gger; ²⁴ yaa yoxl Yuesuyal dax bbeix: “Yihexrhuaxr yarzi middei hal ddei maelmaerjjia niul leixrga gga jia ji gger a; halmaex

gga goxr dae ca hazza lei niul leil gexr a, ceirceir-laexlaex gexr mal a,” eine bbeix a.

Yirsaexllixl Su Ca Mel Yuedaxl Lazzarmo Leil Gger

3¹ Yuesuyal eilneixrnehe ha du lei a, Yirsaexllixl su ca mel dax cirgo a Sixltixr mermi ddux a, Yuedaxl lazzarmo dax ssi ci a dder halmaex hher dae a, xia dae a lazzarmo leil gger.² So ni cir ni goxr jjia zzirdae car a, vaervaerpor mel ca mel hher ggie ssi jiax jjia a,³ cassor-worssor mel leil miardal a bbeix: “Nia, Arbosobo leil zi su Lixlweixl su ca mel, nia ddei Arbosobo Yihexrhuaxr ddei Yueguixl ddei leil bil dae ggie mia car a, nia hher ggie ddux lei a, giedaebbaer mae dae nia.⁴ Nia mel jjiumo eil zex leil ssi nr goxr a, yel yaa xilmeirbbaer jjiumo hier dae var. Nael nia yueguixl ddei dax naer nr ddo, yueguixl ddei giedaebbaer mae dae a, cir golir jjiumo giex dae nia.”⁵ Giedae Yuesuyal cassor-worssor mel leil miardal a bbeix: “Arggeni Yihexrhuaxr nia dax seirseirmo murgurgurmo bei nia, yel nia eilni armael leil ggecir nei nixmox seibeix lol nia.”⁶ Yuesuyal yoxl Arbosobo leil zi su ca mel leil bbeix: “Nia yueguixl ddei bil du lei a, cassor-worssor mel xilmeir leil gger,” eine bbeix a. Yel yaa dder yueguixl ddei bil du lei a, cassor-worssor mel xilmeir ssi dae a.

⁷ Yihexrhuaxr Yuesuyal leil bbeix: “Eilni cirdae a, ngo arsae bei lei ni leil Yirsaexllixl su ca maelmaerjjia meixsaer qir leil middux lol nia, yaa leil ngo Moxrxi dax arsae hher dax dae mel, ni dax lei arsae hher dax dae saexl lol nia.⁸ Ni yueguixl bil su Arbosobo leil zi su mel leil miardal nia, yaa leil bbeix: ‘Nia Yuedaxl lazzarmo qir leil ssi ci car, Yuedaxl lazzarmo gga ngier dae nia,’ eine bbeix nia.”⁹ Yuesuyal Yirsaexllixl su ca mel leil bbeix: “Nia lei naer lei a, nia ddei Arbosobo Yihexrhuaxr ddei ddar noni lei.¹⁰ Eine nga a nia dder arddolcar ci a lei gol dae Arbosobo ddei nia aga gga hher dae saexl var; yar arsae bei lei nia meixsaer qir leil Jianaxr su ca Jianaxr su ca, Hexl su ca, Xiweixl su ca, Birlixlsir su ca, Gexrjiasar su ca, Yalmoxrlixl su ca nei Yibuxlsi su ca mel leil ggaxr teixl gger nia.¹¹ Merwoxrke maelmaerjjia ddei seirpor Yihexrhuaxr ddei Yueguixl ddei

nia xilmeir leil gger a, Yuedaxl lazzarmo gga ssi ci a; nia dder arddolcar ci a lei gol dae Arbosobo ddei nia dax hher dax dae saexl a. ¹² Eilcar nia Yirsaexllixl ceinir (12) cuxr gga, cir cuxr gga ca ar ddei tiur a, ca ceinirmo (12) tiur nia. ¹³ Arbosobo leil zi su mel, mer woxrke ddei seirpor Yihexrhuaxr ddei Yueguixl ddei bil dae a, cikata ddei Yuedaxl lazzarmo gga toxl ji a qie, jiasibbor piar a gga pe zeil lei dae Yuedaxl lazzarmo ddei ajjix mel dder pe nor a, lu sael ar du loxr nia,” eine bbeix a. ¹⁴⁻¹⁵ Halcar mel loxlmoxr se zicar nga a; lazzarmo gga ajjix mel mil deix lei a, lazzarmo yarher nr bbu jjia leil lei mil hex a. Cassor-worssor mel zaxlpoxr ba dae a, lazzarmo leil gger niazzir dae car, Yueguixl bil su Arbosobo leil zi su mel xilmeir ssi dae. Yaa qihher bbor lazzarmo gga toxl ji a qie, ¹⁶ ggaxrsibbor piar a gga pe zeil lei dae ajjix mel pe nor dae a, vimirmir ggie Sarladaxl dax naer dae Yalda zzi halmaex lu sael a vizzate do gex dae a. Yallaba neixvi gga hherdder cor zza neixvi gga pe mal dae ajjix maelmaerjjia pe nor dae a; yel cassor-worssor mel dder halbbor halbbu leil Yilixlge zzi gga ssi gel a. ¹⁷ Yihexrhuaxr ddei yueguixl bil su Arbosobo leil zi su mel Yuedaxl lazzarmo gga hieltebbor ngier dae a, Yirsaexllixl su ca maelmaerjjia hieltebbor ssi gger a, cassor-worssor mel maelmaerjjia Yuedaxl lazzarmo leil gger jjia zzeze ci a.

Legelbbe Taex Ngier Dae Lol A Hoxltexr Bei

4 ¹ Cassor-worssor mel maelmaerjjia lei Yuedaxl lazzarmo zex leil gger jjia ho a, Yihexrhuaxr Yuesuyal leil bbeix: ² “Ni cassor-worssor mel gga ca ceinirmo (12) tiur teixl lei nia, cir cuxr gga ca ar ddei tiur nia, ³ yaa leil miardal a bbeix: ‘Nia Yuedaxl lazzarmo gga Arbosobo leil zi su mel ddei qihher ddei ngier ggie halmaex, legelbbe ceinir (12) taex bbax si lei a, eilmei nia xixl ggie halmaex dol nia,” eine bbeix a. ⁴ Yel, Yuesuyal yar Yirsaexllixl su ca mel gga tiur teixl lei ca hal ceinirmo (12) leil ae si lei a, ⁵ yaa leil bbeix: “Nia Yuedaxl lazzarmo gga zeil a, nia ddei Arbosobo Yihexrhuaxr ddei yueguixl xilmeirbbaer ssi a, Yirsaexllixl su ca ceinir (12) cuxr zza ddei dax zox dae a, cir ddei legelbbe ar taex bbax a paezixl-

leixr leil bil dae. ⁶ Legelbbe eilmel nia ca mel gga hoxltexr bei nia. Eilni-arggeni, nia ddei lilbol-lilmo mel nia leil: ‘Legelbbe eilmel azo yilsi a lei?’ biex a, ⁷ nia dder yaa leil ddarkoxl a bbeix: ‘Eil ddei mel Yuedaxl lazzarmo gga ajjix mel Yihexrhuaxr ddei yueguixl xilmeir leil pe nor a. Yueguixl ddei Yuedaxl lazzarmo gga gger car, Yuedaxl lazzarmo gga ajjix mel pe nor dae a nga arddeir a. Legelbbe eilmel arddol car ci a lei Yirsaexllixl su ca mel ddei hoxltexr bei nia.’ ”

⁸ Yirsaexllixl su ca mel Yihexrhuaxr Yuesuyal leil miardal lol mel sael a, Yirsaexllixl su ca hormo cuxr zza mel dax zox dae a, Yuedaxl lazzarmo gga legelbbe ceinir (12) taex bbax si lei a, yaa xixl ggie halmaex bbax dol dae a. ⁹ Yuesuyal kebel legelbbe ceinir (12) taex bbax a, Yuedaxl lazzarmo gga yueguixl bil su Arbosobo leil zi su mel qihher zze ngier ggie halmaex dae ji gger a; eilni ci a lei, legelbbe hal mel halae halmaex zza dae seir. ¹⁰ Yueguixl bil su Arbosobo leil zi su mel Yuedaxl lazzarmo gga ngier dae a, Yihexrhuaxr Yuesuyal leil cassor-worssor mel leil miardal lol a bei lol cirjji-hanga bei jjia zzezze ngier ci a. Eilmel mel, Moxrxi Yuesuyal leil miardal dae ddar hazza dax zox dae.

Yel cassor-worssor mel dder jiuurjiur-maemae gger a. ¹¹ Cassor-worssor mel maelmaerjjia lei lazzarmo leil gger jjia a. Giedae Arbosobo leil zi su mel Yihexrhuaxr ddei yueguixl ddei bil dae a, cassor-worssor mel meixsaer qir leil gger a. ¹² Liurbixl su ca, Jiadaexr su ca nei Marnaxrsi su ca cir peix lei Moxrxi yaa leil miardal dae mel dax zox dae a, zzi deil labox vei dae a, Yirsaexllixl su ca mel xilmeir leil gger a. ¹³ Ca limeir (40,000) sael a mel, zaxlddaexr ssi cexr geso har dae a, Yihexrhuaxr meixsaer qir leil gger a, Yilixlge mermi bbaelerler ggie ssi a, xia dae a zaxlddaexr niazzir dae a. ¹⁴ Hal cir ni, Yihexrhuaxr Yirsaexllixl su ca mel leil Yuesuyal leil vaervaerpor vaervaer ddei i mal gger lol; yar gol dae nixixl hazza gga, cassor-worssor mel halleix Moxrxi leil i du mel sael a yar leil i du.

¹⁵ Yihexrhuaxr Yuesuyal leil bbeix: ¹⁶ “Ni yueguixl bil su ngo leil zi su mel leil miardal a, Yuedaxl lazzarmo gga ddeix lei lol” bbeix a, ¹⁷ Yuesuyal dder Arbosobo leil zi su mel leil miardal a bbeix: “Nia Yuedaxl lazzarmo gga ddeix lei,” eine bbeix a. ¹⁸ Yihexrhuaxr ddei

yueguixl bil su Arbosobo leil zi su mel Yuedaxl lazzarmo gga ddeix jjiyr lei a. Qitaka ddei hieltebbor toxl deix a qie, Yuedaxl lazzarmo gga ajjix mel dder halleix sael a, pe xixl dae a; lazzarmo yarher nr bbu jjia leil lei mil hex a.

¹⁹ Guxlsixlxixu ddeix cei cir ni, cassor-worssor mel Yuedaxl lazzarmo gga ddeix lei a dder Yilixlge zzi dofa piar a gga, Zixrjiaxr mermi hher dae a. ²⁰ Yuesuyal mel, yaa Yuedaxl lazzarmo gga bbax si lei legelbbe hal ceinir (12) taex, Zixrjiaxr mermi dae ji gger a. ²¹ Yar Yirsaexllixl su ca mel leil bbeix: “Arddolcar, nia ddei ssormine mel yaa ddei arbbor leil: ‘Legelbbe eilmel azo yilsu a?’ biex arddeirnga a, ²² nia dder yaa leil bbeix gger a bbeix: ‘Halleix, Yirsaexllixl su ca mel hieltebbor ssi a, Yuedaxl lazzarmo eil zex gga gger a. ²³ Nia ddei Arbosobo Yihexrhuaxr mel nia xilmeir leil Yuedaxl lazzarmo gga ajjix mel hie lol a, xia dae a, nia leil gger lol; hherdder halleix yar ngua xilmeir neixvi nilni bbe hie lol a, xia dae a, ngua leil gger lol mel sael a nga. ²⁴ Yel middurbbor cassor-worssor mel leil Yihexrhuaxr mel yarzi ddo saexl lol, halae nia leil arddolcar a ci a lei nia ddei Arbosobo Yihexrhuaxr leil i du lol,” eine bbeix a.

5 ¹ Yuedaxl lazzarmo xifa piar a gga Yalmoxrlixl su ca mel ddei zzirmar mel nei neixvi dax naer dae Jianaxr su ca mel ddei zzirmar mel, Yihexrhuaxr Yirsaexllixl su ca mel xilmeir leil Yuedaxl lazzarmo gga ajjix mel hie lol a, yaa leil ssi gel lol bbejjiur a dder nixmox lei gexr bbeir jjia a; azo lei bei nr bel a.

Zixrjiaxr Worga Leil Gelir Bei

² Halcar, Yihexrhuaxr Yuesuyal leil miardal a bbeix: “Ni legelbbe sser a altor sael mal a, Yirsaexllixl su ca mel leil zeixleixr gelir bei^a gger nia,” eine bbeix a. ³ Yuesuyal dder legelbbe mel altor sael mal a, gelir worga halmaex Yirsaexllixl su ca mel leil gelir bei gger a. ⁴ Yuesuyal yaa leil gelir bei gger a mel, Aezixr goxrjia gga ddux lei, zaxlddaexr bbe capor maelmaerjjia lei hierbolpae gga, jjiumo gga si zil dae ho a nga arddeir a. ⁵ Aezixr goxrjia gga ddux lei capor

^a5:2 zeixleixr gelir bei Yilsu mel dder: Aezixr goxrjia ddux lei ho a sael xiu teixl lei capor mel leil gelir bei gger.

maelmaerjjia lei gelir bei goxr a; nael hierbolpae gga ssi ci ho a xiu teixl lei Yirsaexllixl su ca maelmaerjjia lei gelir bei nr goxr seir. ⁶Yirsaexllixl su ca mel Yihexrhuaxr ddei ddar nr no, yel yaa hierbolpae gga licei (40) koxl ssi za doxr a, Aezixr goxrjia gga ddux lei zaxlddaexr bbe capor maelmaerjjia si jjia zzezze ci a. Yihexrhuaxr mel yaa dax arsae bei lei yaa leil niurbax nei bbiurvi pe ggie mermi ddei leil nr mia lol bbeix har zaxr goxr a. Mermi hal ddei mel dder yaa ddei porpor mel leil gger nia bbeix har zaxr goxr hal ddei nga a. ⁷Yihexrhuaxr mel yaa giedae ca mel leil yaa dirtu bei lol a. Jjiumo car gga mel yaa leil gelir bei gger nr goxr, yel jiajia ddux lei Yirsaexllixl su ca eil coxr mel gelir bei nr goxr seir a, Yuesuyal dder yaa leil gelir bei gger a.

⁸Cassor-worssor mel gelir bei ho a, armael ddei hher ggie hher dae a, yaa kor jjia zzezze hher ci a. ⁹Yihexrhuaxr Yuesuyal leil bbeix: “Ngo eilni nia leil nia Aezixr goxrjia gga zebol mu goxr seixl-daddo mel bei pixl gger a,” eine bbeix a. Yel middei hal ddei leil eilni zzezze lei “Zixrjiaxr”^b eine bbeix.

¹⁰Yirsaexllixl su ca mel Zixrjiaxr mermi hher dae. Guxlsixlxiu ceili cir xixlmei, yaa Yilixlge mermi bbaelerler ggie Yuxlyuexl jiax goxr. ¹¹Yuxlyuexl jiax giedae cir ni, yaa dder middei halmaex gga dae teixl lei loxlmoxr mel zzor a; hal cir ni malmal miljiazi ji nr goxr aba nei kal teixl lei so ne mel zzor a. ¹²Yaa middei halmaex gga dae teixl lei loxlmoxr mel zzor ho giedae cir ni, marnaxr mel dder zeixleixr lei nr zeil lei a; Yirsaexllixl su ca mel dder zeixleixr Marnaxr zzor wo su ca nr zza a. Hal cir koxl, yaa mel Jianaxr mermi dae teixl lei loxlmoxr mel zzor a.

Yihexrhuaxr Ddei Meixr Mel Ddei Vaervaerpor

¹³Yuesuyal Yilixlge zzi dax ssi naer ci car, meixddur zze i du lei a, xiar lei xiar nr ci, ca ar ddei a leixrhher gga die teixl lei ho altor ar baex vei dae a, yar deixrgoxr ngier dae ggie mia a. Yuesuyal yar dax ssi ci a, yar leil biex a bbeix: “Ni mel ngua leil beijjiu lei,

^b5:9 Zixrjiaxr Zixrjiaxr ddei yilsi mel dder “bei pixl gger”.

bbeixsael ngua leil dir su mel leil beijjiu lei leir?” ¹⁴ Yar ddarkoxl a bbeix: “Arseir leil beijjiu lei nr nga. Ngo lei a mel, Yihexrhuaxr ddei meixr mel ddei vaervaerpor bei lei.” Yuesuyal dder middur ddei leil puxr gex dae a, bbeix: “Ngo ddei seirpor, ni, ni leil miar bei gger su leil azo ddar miardalddu zza.” ¹⁵ Yihexrhuaxr ddei meixr mel ddei vaervaerpor ddei Yuesuyal leil bbeix: “Ni ngier ggie middei eilmaex mel bbe teixl lei a, Yihexrhuaxr ddei a; yel ni qihher leil qixnex zze lixr teixl,” eine bbeix a, Yuesuyal dder eilmel sael a bei a.

Yilixlge Zzi Ddei De Zei A

6 ¹ Yilixlge zzi gga ca mel Yirsaexllixl su ca mel leil gexr a, zzi gielmi alddur maelmaerjjia zilzir ggabil dae. Ddir su ca lei nr zza; ddux su ca lei nr zza. ² Yihexrhuaxr Yuesuyal leil bbeix: “I ddo a! Ngo Yilixlge zzi ddei leil, Yilixlge zzi ddei zzirmar ddei leil nei zzi deil sexrsexr ca mel leil lei ni leixrga gga jia ji gger ho a. ³ Nia meixr maelmaerjjia cir ni zzi ddei leil ar za za ssi nia, cir ni lei nr giex qiuxl ni za nia. ⁴ Ngo leil zi su sirler ya cuxgexdaex sir baex vei dae a, Yueguixl ddei xilmeir leil ssi dae nia. Sir ni cir ni ci a, nia zzi ddei leil sir za za nia, ngo leil zi su mel lei cuxgexdaex mex nia. ⁵ Nia cuxgexdaex ddei darsisimo me ggie bbejjiur car, cassor-worssor maelmaerjjia worcixl-worni ae nia, zzi weixrqiaxr ddei dder de ze nia; cassor-worssor mel dder xilmeirbbaer beix deix nia,” eine bbeix a. ⁶ Yel Nexl ddei ssor Yuesuyal dder Arbosobo leil zi su mel leil ae si lei a, yaa leil bbeix: “Nia yueguixl ddei bil du lei nia, Arbosobo leil zi su sirler ya cuxgexdaex sir baex vei dae a, Yihexrhuaxr ddei yueguixl ddei xilmeir leil ssi dae nia.” ⁷ Yar yoxl cassor-worssor mel leil bbeix: “Nia ssi a, zzi ddei leil za ssi; zaxlddaexr labox vei dae ca mel Yihexrhuaxr ddei yueguixl ddei xilmeir leil ssi dae nia,” eine bbeix a.

⁸ Yuesuyal cassor-worssor mel dax ddar bbeix jjia a, Arbosobo leil zi su sirler dder cuxgexdaex sir baex vei dae a, Yihexrhuaxr meixsaer qir leil ssi dae a, cuxgexdaex mex; Yihexrhuaxr ddei yueguixl ddei yaa giedae mae dae. ⁹ Zaxlddaexrddu vei su mel, cuxgexdaex mex dae Arbosobo leil zi su mel ddei xilmeirbbaer ssi dae; kebal

meixr mel Yueguixl giedaebbaer ssi dae, Arbosobo leil zi su mel jjiu-
mo cir zex gga cuxgexdaex mex dae. ¹⁰ Yuesuyal cassor-worssor
mel leil miardal a bbeix: “Nia ae nr ddo, ca mel leil nia ddei qiurte
bbejjiur lol nr ddo, nia meir ddei gga ddar cir qir lei bax bbeix teixl
lei nr ddo. Ngo nia leil ‘Ae ddo a’ bbeix car saelnei nia ae ddo,” ei-
ne bbeix a. ¹¹ Yel Yuesuyal dder Yihexrhuaxr ddei yueguixl ddei leil
zzi ddei leil za lol. Zzi ddei leil ar za za a, ca maelmaerjjia yaa hher
ggie jjixr ci a dder halmaex xixl dae a.

¹² Giedae cir ni, Yuesuyal eilneixrnehe ha du lei a, Arbosobo leil zi
su mel yoxl Yihexrhuaxr ddei yueguixl ddei bil du lei a. ¹³ Arbosobo
leil zi su sirler ya cuxgexdaex sir baex vei dae a, Yihexrhuaxr ddei
Yueguixl xilmeir leil ho ssi ho cuxgexdaex mex. Zaxlddaexr a sser
labox mel vei dae ca mel nael, yaa xilmeir ssi dae. Kebal meixr mel
nael, Yihexrhuaxr ddei yueguixl ddei giedae mae dae. Arbosobo leil
zi su mel, ho ssi ho mex dae. ¹⁴ Nr ni cir ni, yaa yoxl zzi ddei leil ar
za za a dder hher ggie jjixr a. Qiuxl ni jjia lei eilmel sael a bei.

¹⁵ Sir ni cir ni eilneixrnehe merteir car, yaa ha du lei a, zoxlzoxl
sael a zzi ddei leil za ssi, maelmaer a sir za za a; eilni larnei yaa
zzi ddei leil sir za za. ¹⁶ Sir za ddei za car a, Arbosobo leil zi su mel
cuxgexdaex mex car, Yuesuyal cassor-worssor mel leil miardal a
bbeix: “Ae ddo a! Yihexrhuaxr mel zzi ddei nia leil jia gger ho a!

¹⁷ Zzi eil ddei nei zzi ddei gga maelmaerjjia lei Arbosobo meixsaer
qir leil mier nia. Ggecir vurler su ssormaer Lahexr mel, niul miardal
teixl a middei ker i ssi lol su ca mel leil kerzi du lei a. Yel yar nei
yar dax cirgo a yar ake gga hher dae ca mel larnei gol dae cexr.

¹⁸ Nia nael, fadae nia, mier lol labox zzaegu mel vei nr ddo. Nrnga
a, nia armael leil si lol var, halae Yirsaexllixl su ca mel leil lei nr
seir ddeix lol var. ¹⁹ Piu, saer, halae zzir nei he bei teixl lei zzae-
gu maelmaerjjia lei kebal zzaegu mel dax bbe teixl lei a, Yihexr-
huaxr leil gger nia; Yihexrhuaxr ddei zzaegu dol ggie dol ji nia,” ei-
ne bbeix a. ²⁰ Yel cassor-worssor mel ae, Arbosobo leil zi su mel lei
cuxgexdaex mex. Cassor-worssor mel, cuxgexdaex mex ggie bbe-
jjiur a dder merbbia-labbia ae a, Yilixlge zzi ddei weixrqiaxr ddei
dder de zei a. Cassor-worssor mel dder xilmeirbbaer beix mal a zzi

ddei gga beix dil a, zzi ddei leil su si lei a. ²¹ Yaa yoxl altor sser a, zzi gga capor ssormaer, marmar-leixlleixl maelmaerjjia leil nei niur, acixl ya, torlodaex maelmaerjjia leil seixl zil gger a.

²² Yuesuyal middei ker i ssi su ca hal nnel leil miardal a bbeix: “Nia ggecir vurler su ssormaer hhexr ake ddir a, nia yar dax bbeix har dae mel dax zox dae a, yar leil nei yar ddei ake ca maelmaerjjia leil hier teixl la,” eine bbeix a. ²³ Middei ker i ssi su caleixlssor hal nnel dder ddir a, Lahexr nei yarbbor yarma, yar ddei arzzinimar nei yar ddei hazza, halae yar ddei cirssor hazza leil hier teixl lei a, Yirsaexllixl su ca mel hher ggie maelleil hher dae lol. ²⁴ Yel cassor-worssor mel dder adoxl sser a, Yilixlge zzi ddei leil nei zzi ddei gga maelmaerjjia leil lei cu pixl gger a. Piu, saer, halae zzir nei he bei teixl lei zzaegu mel lar Yihexrhuaxr ddei zzaegu dol ggie dol ji gger. ²⁵ Ggecir vurler su ssormaer Lahexr mel, Yuesuyal miardal teixl a, Yilixlge zzi ddei leil ker i ssi su hal nnel leil kerzi du lei a; yel Yuesuyal dder yar leil nei yarbbor yaa cirhhexr-lorbba leil gol dae lol a. Eilni zzezze ci a lei, yaa Yirsaexllixl su ca mel dax hher dae. ²⁶ Halcar, Yuesuyal ca mel leil bbeix har zaxr lol a bbeix: “Yilixlge zzi ddei leil bei box su ca ddei leil Yihexrhuaxr meixsaer qir leil nr seir lol nia. Yar sixrjiuxr xiax car, yar ddei ssor vaervaer ddei si nia; yar zzi gielmi alddur bei car, yar ddei ssor yelye ddei si nia,” eine bbeix a. ²⁷ Yihexrhuaxr Yuesuyal dax cirgo a hher dax dae a, Yuesuyal ddei mi ddei cirmaex-hanga biar ci a.

Yalga Zuixl Bei

7 ¹ Yirsaexllixl su ca mel mier lol labox zzaegu mel vei a zuixl bei a. Yoxrdaxl cuxr gga Xixlla ddei leixwor, Sardir ddei lilbol, Jiamir ddei ssor Yalga mel mier lol labox zzaegu ar mel vei a, Yihexrhuaxr dder Yirsaexllixl su ca mel leil seifu faex. ² Halcar, Yuesuyal Yilixlge zzi gga ca miardal a Boxrtexllixl ddei dofa piar a gga Boxryalweixr dax naer dae Aexl zzi gga ssi lol a, yaa leil miardal a bbeix: “Nia ddeix a middei hal ddei leil ker i ssi,” eine bbeix a. Ca hal mel dder ddeix a Aexl zzi ddei leil ker i ssi a. ³ Yaa Yuesuyal dax halmaex jjixr ci a, yar leil bbeix: “Halmaex gga ca mel mel nganiul, yel ca

cirke-lorbba ddeix nr ssa, ca nr-sodu ddeix a dder Aexl zzi ddei leil ddaexr ze i gger ddo a; ca cirke-lorbba leil bei le ssi lol nr ssa,” ei-ne bbeix a. ⁴Yel ca mel gga sodu sael a halmaex ddeix a; nael yaa ddaexr wor nr xie a, Aexl zzi gga su ca mel meiksaer qir leil pa a. ⁵Aexl zzi gga ca mel yaa leil ca socei qiuxller seixl zil gger a. Zzi gielmi alddur dax yaa leil ggaxrmae ssi a, Sixlbalixr mermi zzezze ggaxrmae ci a; zilbbor ze i ggie yaa leil deil leixl gger a. Yirsaexllixl su ca mel ceirceir-laexlaex gexr mal a.

⁶Yel Yuesuyal dder pia xiux si bbaer gger a; yar nei Yirsaexllixl su ca leil guaxr su camar mel, Yihexrhuaxr ddei yueguixl ddei xilmeir leil middur ddei leil puxr gex dae a, eilmerxixl zzezze ci a. Yaa yoxl nilme mel oldde leil xiu deix. ⁷Yuesuyal bbeix: “Eil'aer! Seirpor Yihexrhuaxr, ni arsaenga a ngua leil Yuedaxl lazzarmo gga hier gel lei leir? Ni ngua leil hier gel lei a mel, ngua leil Yalmoxrlixl su ca mel leixrga gga jia ji gger a, ngua leil bei zil gger a ngo? Ngua Yuedaxl lazzarmo halpiar a gga hher dae bbaexl seir a! ⁸Seirpor, eilboxl Yirsaexllixl su ca mel yaa leil dir su mel meiksaer qir leil za xixl lei a beix du si a; ngo halae azo bbeix cexr seir bbeixleir?” ⁹Jianaxr su ca nei middei eil ddei gga goxr dae ca hazza bbejjiur a dder arsae bei lei ngua leil weixr gex du lei a, ngua leil ddaexr a, ngua ddei mi mel middurbbor mier lol var. Halcar, ni, ni ddei yarzi middux mi ddei leil weix a arsae bei var neil?

¹⁰Yihexrhuaxr Yuesuyal leil bbeix: “Ha du la! Ni arsaenga qiaxr-meix ddei middur ddei leileine puxr gex dae leir? ¹¹Yirsaexllixl su ca mel zuixl bei a; yaa ngo yaa leil miardal dae bbeix har zaxr dae mel dax bei nr mae. Yaa mier lol labox zzaegu mel ker vei a, armael ddei zzaegu mel dax ji dax dae, halae ddarzi nr bbeix. ¹²Yel, Yirsaexllixl su ca mel yaa leil dir su ca mel meiksaer qir leil ngier ver nr xie a. Yaa yaa leil dir su ca mel meiksaer qir leil nolgger ddei pox xixl si a pa du si a mel, yaa mel nr seir lol dae ca mel loxr ho a nga arddeir a; nia nia dax mier lol labox zzaegu mel leil piar pixl nr gger arddeirnga a, ngo dder zeixleixr nia dax hher nr dax a. ¹³Ni ha du la a, cassor-worssor mel leil miardal a armael leil seibeix lol, halae yaa leil bbeix: Yirsaexllixl su ddei Arbosobo Yihexrhuaxr eine

bbeix a: yar bbeix: ‘Yirsaexllixl su ca mel, nia dax mel mier lol labox zzaegu zza dae. Nia mier lol labox zzaegu mel piar pixl nr gger arddeirnga a, nia, nia leil dir su ca mel meixsaer qir leil ngier ver nr xie,’ eine bbeix a. Yel nia arggeni leil weix a, armael leil seibeix zaxr lol nia,” eine bbeix a. ¹⁴ “Eilneixrnehe ci a, nia circuxr-circuxr dax zox dae a xilmeirbbaer lei nia; Yihexrhuaxr ae dae cuxr, jiacuxr cirhhexr-cirhhexr dax zox dae a xilmeirbbaer lei nia; Yihexrhuaxr ae dae jiacuxr hal hhexr, ake ca cirhhexr-cirhhexr dax zox dae a xilmeirbbaer lei nia; Yihexrhuaxr ae dae ake ca hal hhexr ca cirddei-cirddei xilmeirbbaer lei nia. ¹⁵ Ae teixl lei ca ddei mel, mier lol labox zzaegu mel yar dax halmaex zza dae, yar mel Yihexrhuaxr bbeix har zaxr dae mel dax bei nr mae, yoxl Yirsaexllixl su ca mel gga yarzi seixldaddo mel bei, yel yar leil nei yar ddei hazza leil arsae bei lei adoxl gga cux pixl gger nia.”

¹⁶ Yel, giedae cir ni, Yuesuyal eilneixrnehe ha du lei a, Yirsaexllixl su ca mel leil cuxr mel dax zox dae a yar xilmeirbbaer lei lol a, Yoxrdaxl ddei cuxr leil nijiu wo a. ¹⁷ Yoxrdaxl ddei cuxr leil xilmeirbbaer lei lol a dder Xixlla ddei jiacuxr leil nijiu wo a; Xixlla ddei jiacuxr hhexr leil cir hhexr cir hhexr dax zox dae a, cir ddei cir ddei xilmeirbbaer lei lol a, Sardir hhexr leil nijiu wo a. ¹⁸ Sardir hhexr leil, ca mel dax zox dae a, cir ddei cir ddei xilmeirbbaer lei lol a dder, Yoxrdaxl ddei cuxr gga ca Xixlla ddei leixwor, Sardir ddei lilbol, Jiamir ddei ssor Yalga leil nijiu wo a. ¹⁹ Yuesuyal Yalga leil bbeix: “Ngo ddei ssor, ngo ni leil quex, Yirsaexllixl su ddei Arbosobo Yihexrhuaxr leil middux lol nia, yar meixsaer qir leil zuixl mel cexr-ssexl a, ni bei dae mel ngo leil bbeix gger, ngo dax kerzi nr ddo.” ²⁰ Yalga Yuesuyal leil ddarkoxl a bbeix: “Ngo yarzi Yirsaexllixl su ddei Arbosobo Yihexrhuaxr leil de dae a. Ngobei dae mel eine a: ²¹ Su si lei zzaegu mel gga, ngo Sixlnaxr mermi ddei pia zaelzaemo ar xiux mia, halae piu nr zi nei sae yil silji sael zza ar zex mia a. Ngo zzaegu eil mel leil nolnger a dder vei si lei a. Zzaegu eilmel ngo hher ggie zaxlpoxr gga middurzzar giexl kerzi dae, piu mel zilele dol dae.”

²² Yuesuyal dder ca leil miardal a, Yalga ddei zaxlpoxr gga beix mal lol. Zzaegu mel, yarzi yar ddei zaxlpoxr gga kerzi dae; piu mel, zilele dol dae. ²³ Yaa dder zzaegu eilmel zaxlpoxr gga vei teixl lei a, Yuesuyal nei Yirsaexllixl su ca maelmaerjjia dax halmaex vei ci a, Yihexrhuaxr meixsaer qir leil dol dae a. ²⁴ Yuesuyal nei yar dax cirgo a hher dae Yirsaexllixl su ca maelmaerjjia, Xixlla ddei leixwor Yalga leil hier dae nei piu hal mel, pia hal xiux nei sae hal zex vei dae, halae Yalga ddei ssormine mel leil hier dae, niur, tarlodaex, acixl ya mel ggaxr dae a, zaxlpoxr nei cirza-hanga ba dae a, Yalge lagiex gga ssi ci a. ²⁵ Yuesuyal bbeix: “Ni arsaenga a nr seir mel ngua dax lei lol leir? Eilni Yihexrhuaxr arsae bei lei nr seir mel ni leil ddeix lol nia,” eine bbeix a. Yel Yirsaexllixl su ca maelmaerjjia dder legelbbe vei a, Yalga leil nei yar ddei ca halae zzeir hazza leil zax zil gger a. Zax zil gger ho a, yoxl yar leil nei yar ddei hazza leil adoxl gga cu. ²⁶ Yaa Yalga ddei ggecir ddei leil legelbbe vaer-vaermo ar mar mar du lei a; eil ni ci a lei zza dae. Yel Yihexrhuaxr dder yar leil seifu larhorhormo nr faex a. Yel middei halmaex eilni zzezze Yalge lagiex mi.

Aexl Zzi Ddei Leil Ddaexr Zei Gger

8 ¹ Yihexrhuaxr Yuesuyal leil bbeix: “Gexr nr ssa, zzilzzil-zzerzzer zza nr ssa. Ni ngier du la a, meixr maelmaerjjia leil hier dae a, Aexl zzi ddei gga ddeix. Ngo Aexl zzi ddei gga zzirmar ddei leil, yar ddei cassor-worssor mel leil, yar ddei zzi mel leil nei yar ddei middei maelmaerjjia leil lei ni leixrga gga jia ji gger a. ² Ni Yilixlge zzi nei Yilixlge zzi ddei zzirmar leil arsae bei mel, Aexl zzi nei Aexl zzi ddei zzirmar leil lei arsae bei nia. Nael eilboxl mel, zzi gga su si lei zzirbae, zzaegu nei zzeir mel, nia armael li ddo. Nael, ni zzi ddei giedae piar a gga hoba meixr ar mel neix dae lol nia.”

³ Yel, Yuesuyal nei meixr maelmaerjjia lei ngier du lei a, Aexl zzi gga ddeix niazzir dae a. Yuesuyal meixr yarzi ddo yarzi sexr so-meir tiur teixl lei a, yaa leil miardal a, eilmerxixl ssi lol. ⁴ Yar yaa leil miardal a bbeix: “Nia zzi ddei giedae piar a gga neix dae nia; zzi ddei dax giex vimir nr ddo; arddolcar a lei zaxlddaexr ssi cexr bei

har zaxr dae nia. ⁵ Ngo meixr mel leil hier dae a, xilmeir piar a gga zzi ddei leil ddaexr var. Zzi gga ddei ca mel xilmeir halboxl sael a ddux lei a ngua leil ddaexr lei car, ngua dder yaa xilmeir leil beix du si, ⁶ yaa arsae bei lei: 'Ca eimel xilmeir boxl sael a niul meixsaer qir leil beix du si a,' eine bbeix var. Yel yaa ngua leil ggaxr mae lei a, ngua yaa leil fur a zzi ddei gga ddux lei ho hane zzeze ci var. Ngua yaa meixsaer qir leil pa du si nia. ⁷ Nia dder nia neix ggie beix teixl lei a, Aexl zzi ddei leil ddaexr nia. Nia ddei Arbosobo Yihexrhuaxr arsae bei lei Aexl zzi ddei leil nia leixrga gga jia ji gger nia. ⁸ Nia zzi ddei leil ddaexr zei gger ho a, Yihexrhuaxr miardal dae mel dax zox dae a adoxl sser a, zzi ddei leil cu. Eil ddei mel ngo nia leil miardal arddeir a." ⁹ Yel Yuesuyal yaa leil miardal a ssi lol a. Yaa dder ssi a, Boxrtexllixl zzi nei Aexl zzi agala gga, hherdder Aexl zzi xifa piar a gga neix dae a. Hal cir xixlmei Yuesuyal mel, cassor-worssor mel dax xixl dae a. ¹⁰ Giedae cir nehe, Yuesuyal neixrneixr-sisi ha du lei a, cassor-worssor mel leil ae pex du lei a. Yar nei Yirsaexllixl su ca mel leil guaxr su camar mel, cassor-worssor mel xilmeir leil Aexl zzi ddei gga ddeix. ¹¹ Yar dax mae dae a zaxlddaexr ssi su cassor-worssor maelmaerjjia lei ddeix a, xilmeirbbaer ssi mal a, zzi ddei xilmeir leil ssi ci a, Aexl zzi ddei baexrfa piar a gga hher dae a. Yuesuyal nei Aexl zzi ddei agala gga lagiex ar ddei zza. ¹² Yuesuyal ca ngordu sael tiur teixl lei a, yaa leil Boxrtexllixl zzi nei Aexl zzi ddei agala gga neix dae lol, hherdder Aexl zzi ddei xifa piar a gga nga a. ¹³ Yel zzi baexrfa piar a gga zaxlddaexr ssi su meixr maelmaerjjia leil nei zzi xifa piar a gga neix dae lol meixr mel leil hher har dae lol ho a. Hal cir xixlmei Yuesuyal mel, lagiex gga xixl dae a. ¹⁴ Aexl zzi ddei zzirmar ddei, Yirsaexllixl su ca mel zzi ddei dax lei naer ci a mia a dder, neixrneixr-sisi jiuurjiuur-maemae zzi gga ca maelmaerjjia dax cirter a ha du lei a, zzi gga ddux a zaxlddaexr ssi, yaa Yallaba lagiex gga Yirsaexllixl su ca mel dax zaxlddaexr. Nael zzirmar ddei mel zzi ddei giedae piar a gga meixr neix dae nr saexl. ¹⁵ Yuesuyal nei Yirsaexllixl su ca mel yaa meixsaer qir leil ddaexr wor nr xie laexl a, mipaerbbae gga ssi mal dae jjiumo zex dax beix mal si a. ¹⁶ Aexl zzi gga ca maelmaerjjia leil lei ae pex du lei a, Yir-

saexllixl su ca mel leil ggaxrmae ssi a. Yaa Yuesuyal leil ggaxrmae ssi car a, yaa leil dder zzi gga fur teixl gger a. ¹⁷ Aexl zzi ddei gga ca nei Boxrtextllixl zzi ddei gga ca maelmaerjjia ddux lei a, Yirsaexllixl su ca mel leil ggaxrmae ssi a. Yaa gielmi alddur ggapu dae zzi ddei leil piar dol dae a, Yirsaexllixl su ca mel leil ggaxrmae ssi a.

¹⁸ Yihexrhuaxr Yuesuyal leil bbeix: “Ngo Aexl zzi ddei leil ni leixrga gga jia ji gger nia, yel ni leixrhher gga zzi deil a sserddu niulddurddur baex vei teixl lei a, zzi ddei leil dor dae nia,” eine bbeix a. Yuesuyal dder leixrhher ddei cei teixl lei a, zzi deil a sserddu niulddurddur baex Aexl zzi ddei leil dor dae a. ¹⁹ Yar leixrhher ddei cei teixl a gie, neix dae meixr mel dder yaa neix ggie jieurmaemae ddux lei a, zzi gga beix dil a, zzi ddei su wo a; yel adoxl nol a, zzi ddei leil cu. ²⁰ Aexl zzi gga su ca mel za xixl lei a arleixr i a, xiar lei xiar nr ci, zzi ddei gga alker mel merlabbor sil deix jixr a. Yaa mel pa mal ggie lei nr zza a. Mipaerbbae gga beix mal su cassor-worssor hal mel dder za xixl lei a, yaa leil ggaxrmae lei su mel leil ddaexr. ²¹ Yuesuyal nei Yirsaexllixl su ca mel neix dae meixr mel zzi ddei leil su wo ho a mia, halae zzi ddei gga alker lillil a nga mia a dder, za xixl a Aexl zzi gga su ca mel leil seixl ssi. ²² Neix dae meixr mel lei zzi ddei gga ddux a Aexl zzi gga su ca mel leil ggaxrmae ssi. Aexl zzi gga su ca mel leil dder Yirsaexllixl su ca mel gga (giex/jiaxr) ji dae a; xilmeir giedae lei Yirsaexllixl su ca arnga a. Yel, Yirsaexllixl su ca mel yaa leil seixl zil jjia gger a; cir ddei lei nr gol dae a; pato wo su lei ar ddei nr zza a. ²³ Yaa Aexl zzi ddei zzirmar ddei leil nael, yargol ssu xixl lei a, Yuesuyal dax halmaex hier mal gger a.

²⁴ Yirsaexllixl su ca mel altor sser a, mi gga nei mipaerbbae gga yaa leil ggaxrmae lei su Aexl zzi gga su ca hazza leil seixl zil gger a. Yoxl Aexl zzi gga jjixr a, altor sser a, zzi gga hher dae ca maelmaerjjia leil seixl zil gger a. ²⁵ Hal cir ni seixl zil gger ca mel, ssormaersorne maelmaer a mel cirmeir nrdu zza, hherdder Aexl zzi gga su ca maelmaerjjia nga a. ²⁶ Yuesuyal mel Aexl zzi gga su ca mel leil seixl zil jjia gger ho a saelnei yar leixrhher gga zzi deil a sserddu niulddurddur baex se xixl lei. ²⁷ Yirsaexllixl su ca mel, Yihexrhuaxr Yuesuyal leil miardal dae mel dax zox dae a, zzi gga zzirbae, zzae-

gu nei zzeir mel vei si a, armael ddei bei. ²⁸ Yuesuyal Aexl zzi ddei cu pixl gger a, arddolcar ci a lei cirbelde ar be loxr lol; eilni zzeze ci a lei, azo lei nr zza. ²⁹ Yar yoxl Aexl zzi ddei zzirmar ddei leil seixl zil gger a, ggecir ddei sixzzei leil gaxl gex gger a, ca mel leil igax lol. Mercixl car a seilnei yar ca leil miardal a, ggecir ddei vei zei lei a, gielmi alddur dax piar dol gger. Yar yoxl ggecir ddei leil legelbbe darmumumo ar be mar deix gger lol. Legelbbe mar eilni zzeze lei zza dae seir.

Yirbaluxl Worga Leil Ca Mel Leil Lixlfaxr Zza Gger

³⁰ Eine goxr ho a, Yuesuyal Yirbaluxl worga leil Yirsaexllixl su ddei Arbosobo Yihexrhuaxr leil ziggie ar ddei bei gger. ³¹ Yar he ddaexr labox mel ddaexr nr goxr legelbbe durda ar taex sser a bei. Eil ddei mel, Yihexrhuaxr leil visser su Moxrxi Yirsaexllixl su ca mel leil miardal dae ddar mel dax, hherdder Moxrxi Lixlfaxr sul ber leil vaexr deix dae mel dax zox dae a bei. Ca mel dder halmaex gga adoxl gga cu a ziddu mel nei zzaso lol qiuxr a ziddu mel Yihexrhuaxr leil zi. ³² Yuesuyal halmaex hher dae a, Yirsaexllixl su ca mel meixsaer qir leil, Moxrxi vaexr dae Lixlfaxr mel legelbbe leil vaexr deix gger. ³³ Yirsaexllixl su ca maelmaerjjia, hherdder Yirsaexllixl mermi goxr dae Yirsaexllixl su ca mel, bbeixsael ngol hher dae ca mel nei Yirsaexllixl su ca mel leil guaxr su camar mel, vaervaerpor mel, halae ca leil ser su vaervaerpor mel nga zzorbbeixlei, maelmaerjjia lei Yueguixl ddei nrpiar-nrbbu ngier dae. Yaa Yihexrhuaxr ddei Yueguixl ddei leil bil su Arbosobo leil zi su Lixlweixl su ca mel meixsaer qir leil, cir peix a nael Zilixlxi worga dax mal dae, cir peix a nael Yirbaluxl worga dax mal dae a, Yirsaexllixl su ca mel leil seir lol ddar bbeix gger, hherdder Yihexrhuaxr leil visser su Moxrxi halleix miardal dae mel sael a nga. ³⁴ Giedae, Yuesuyal mel Lixlfaxr sul leil vaexr deix dae seir lol nei nr seir lol ddar mel, Lixlfaxr sul leil vaexr deix dae hazza dax zox dae a, maelmaerjjia ar bil zza a. ³⁵ Moxrxi miardal dae ddar hazza, Yuesuyal Yirsaexllixl su ssormaer, anix, nei yaa dax ngol hher dae ca maelmaerjjia meixsaer qir leil cirqir-hanga leil zza a.

Zibixl Su Ca Mel Yuesuyal Leil Fur

9¹ Yuedaxl lazzarmo xifa piar a gga worga leil, worlelzir leil nei neixvi qir leil, halae vimirmirmo Lixrbanexl mermi hher dae zzirmar mel, hherdder Hexl su ca, Yalmoxrlixl su ca, Jianaxr su ca, Birlixlsir su ca, Xiweixl su ca nei Yibuxlsi su ca mel ddei zzirmar mel, eilmel leil bbejjiur a dder,² hher pex du lei a, nixmox zzar ciryoxr a xiar dae a, Yuesuyal nei Yirsaexllixl su ca mel dax zaxlddaexr niazzir.

³ Zibixl zzi gga goxr dae ca mel Yuesuyal Yilixlge zzi nei Aexl zzi ddei leil arsae lerler bei dae mel leil bbejjiur a dder⁴ yarzi jiuxr ar ddei xiar teixl lei a. Yaa ddar bbeix gger lei su bei laexl dae a, lixlba yarli nei zzipbaer ji ddu naexr be goxr sur bbie yarli mel tarlodaex ddei leil jix deix dae,⁵ naexr be goxr qixnex li mel qihher leil ddexr dae, pia li mel ggecir leil veixr dae; yaa vei dae aba maelmaerjjia lei hie zzu dae nei bbexr dae mel a nga.⁶ Yaa Zixrjiaxr mermi Yirsaexllixl su ca mel hher ggie Yuesuyal dax lei a, yar leil nei Yirsaexllixl su ca mel leil bbeix: “Ngua mel vimirmir ggie lei, eilcar ni leil qiuxr, ngua dax niul toltor a bei bbeix har zaxr la.”⁷ Yirsaexllixl su ca mel Xiweixl su ca eilmel leil bbeix: “Nrbba nia dder ngua dax cirgo a goxr dax dae lalnga piar a; eine nga arddeirnga a, ngua arsae nia dax toltor a bei bbeix har zaxr cexr bbeixleir?”⁸ Nael yaa Yuesuyal leil bbeix: “Ngua mel ni leil visser su a.” Yuesuyal yaa leil biex a bbeix: “Nia arseir a? Nia arddolmaex gga lei?”⁹ Yaa ddarkoxl a bbeix: “Ngua mel vimirmir ggie lei, ngua ni ddei Arbosobo Yihexrhuaxr midduxdduxmo bei dae mel leil nei yar Aezixr goxrjia gga bei dae hazza leil bbejjiur,¹⁰ halae yar Yuedaxl lazzarmo dofa piar a gga Yaxlmoxrlixl su ca mel ddei zzirmar nrrnel leil, hherdder Xisixrber zzi gga zzirmar Xihoxr leil nei Yalsitaluxl mermi Basa zzi gga zzirmar Exl leil bei dae hazza leil bbejjiur a.¹¹ Yel ngua leil guaxr su camar mel nei ngua mermi hal ddei gga goxr dae ca maelmaerjjia ngua leil bbeix: ‘Nia jjiumo car a gga zzor labox mel vei dae a, Yirsaexllixl su ca mel leil i ssi nia, yaa leil bbeix: Ngua mel nia leil visser su a; eilcar nia leil qiuxr, ngua dax toltor a bei bbeix har zaxr

la,' eine bbeix lol. ¹² Ngua ddux lei a nia dax lei halcar, ake vei teixl lei aba eilmel mel halae lemel dae seir. I ddo a; eilcar maelmaerjgia lei hie zzu a; bbexr a! ¹³ Zzibbaer ji ddu sur bbie eil mel, ngua zzibbaer ji car halae yarsixl a ngaseir. I ddo a; eilcar xiaxr ho a! Jjiumo mel vimir miur a, yel ngua ddei qixnex mel lei ddexr xiaxr a; pia mel lei veixr xiaxr a," eine bbeix a. ¹⁴ Yirsaexllixl su ca mel yaa ddei zzor labox ar mel li dae a; nael Yihexrhuaxr leil zzael nr qiuxr nr biex. ¹⁵ Yel Yuesuyal yaa dax toltor a bei bbeix har zaxr, yaa leil gol dae lol. Cassor-worssor ddei vaervaerpor mel lei yaa dax toltor a bei bbeix har zaxr dae mel bei ci eine bbeix a.

¹⁶ Yirsaexllixl su ca mel yaa dax toltor a bei bbeix har zaxr ho so ni loxr a saelnei, yaa mel yaa dax goxr naer su a bbejjiur, yaa, yaa dax a goxr ji dax dae. ¹⁷ Yirsaexllixl su ca mel ssi a, so ni cir ni Zibixl su ca mel hher dae zzi cirddei-hanga gga ssi ci a; hherdder Zibixl zzi, Zifeila zzi, Birluxl zzi nei Zilixlyilixr zzi nga a. ¹⁸ Cassor-worssor ddei vaervaerpor mel Yirsaexllixl su ddei Arbosobo Yihexrhuaxr leil dor dae a, yaa dax toltor a bei bbeix har zaxr goxr a; yel Yirsaexllixl su ca mel yaa leil nr seixl. Cassor-worssor maelmaerjgia dder vaervaerpor mel leil boxyox. ¹⁹ Vaervaerpor mel cassor-worssor maelmaerjgia leil bbeix: "Ngua mel Yirsaexllixl su ddei Arbosobo Yihexrhuaxr leil dor dae a, yaa dax toltor a bei bbeix har zaxr goxr a; eilcar niul yaa leil ke nr ddo. ²⁰ Niul yaa leil eine bei nia, yaa leil gol dae lol nia. Nrnga a, niul, niul bbeix har zaxr goxr mel bei nr ci a mel, seifu faex dae mel niul leil ddeix leilei." ²¹ Vaervaerpor mel yoxl cassor-worssor mel leil bbeix: "Yaa leil gol dae lol ddo a," eine bbeix a. Vaervaerpor mel dder yaa leil cassor-worssor maelmaerjgia leil six kaexr gger su nei ajjix bil gger su bei lola.

²² Yuesuyal yaa leil ae si lei a, yaa leil bbeix: "Nia arsaenga a, ngua leil fur a bbeix, nia vimirmirmo hher dae eine bbeix? Nga zzael, nia ngua dax goxr dax dae bbe mar. ²³ Nia ngua leil fur a, Arbosobo nia leil zuixl dixl gger ho a. Yel nia nei nia giedae ca mel arddolcar ci a lei zebol mu nia, ngo ddei Arbosobo ddei xi gga six kaer gger nei ajjix bil gger nia." ²⁴ Yaa Yuesuyal leil ddarkoxl a bbeix: "Ngua bbejjiur a bbeix, ni ddei Arbosobo Yihexrhuaxr mel yar leil

visser su Moxrxi leil middei eilmel maelmaerjjia nia leil gger, halae middei eilmaex gga goxr dae ca maelmaerjjia leil seixl zil gger nia, eine miardal goxr a. Yel, ngua si leilei a gexr a dder eine bei arddeir a. ²⁵ Ni i ddo a! Eilcar ngua ni leixrga gga hher ji dae. Ni zzirdae a ngua leil arsae bei a seir, arsae bei a hoxr mel, ni dder arsae bei ddo a!” ²⁶ Yel Yuesuyal dder yaa leil Yirsaexllixl su ca mel leixrga gga jiuxl teixl lei a, Yirsaexllixl su ca mel dder yaa leil nr seixl a. ²⁷ Hal cir ni, Yuesuyal yaa leil cassor-worssor leil nei Yihexrhuaxr leil zzeir seixlziggie halmaex six kaer gger su nei ajjix bil gger su bei lol a. Eilni zze zze ci a lei, yaa Yihexrhuaxr tiur teixl lei a yar leil zi ggie halmae gga, miar eilmel bei dae.

Yalmoxrlixl Su Ca Mel Leil Ddaexr Leixl Gger

10 ¹ Yiluxlsaler zzirmar Yaldonixr'xirdaexr mel, Yuesuyal Aexl zzi ddei leil su si lei a, beixiexr-beilal ceix gger, halae yar Yilixlge nei Yilixlge zzirmar ddei leil arsae bei, Aexl zzi ddei leil nei Aexl zzi ddei gga zzirmar leil arsae bei eilmel bbejjiur, yoxl Zibixl zzi gga goxr dae ca mel Yuesuyal dax toltor a bei bbeix har zaxr ho a, yaa dax goxr dax dae bbejjiur a, ² yel yaa dder yarzisael gexr. Zibixl zzi ddei mel yarzi vaer zzi ar ddei a; zzirmar hher dae zzi hal mel leilei zza, bir Aexl zzi ddei leil vaer leixl, halae zzi gga ddei ca mel maelmaerjjia lei zzi deil sexrsexrmo hal mel a nga. ³ Yel Yiluxlsaler zzirmar Yaldonixr'xirdaexr ca leil miardal a Xiboxrluixr ddei zzirmar Hexrxiexr, Yimoxl ddei zzirmar Pirlaxr, Lajixr ddei zzirmar Yarfeiyal nei Yiziluixr ddei zzirmar Dirbixl leil i ssi lol a, bbeix: ⁴ “Zilbixl zzi gga ca mel, Yuesuyal nei Yirsaexllixl su ca mel dax toltor a bei bbeix har zaxr ho a. Yel nia leil qiuxr, ddeix lei a, ngo leil beijjiu a, Zibixl zzi ddei leil ddaexr ssi!” eine bbeix a. ⁵ Yel Yalmoxrlixl su ca ddei zzirmar ngorler, hherdder Yiluxlsaler zzirmar, Xiboxrluixr zzirmar, Yimoxl zzirmar, Lajixr zzirmar nei Yiziluixr zzirmar mel, cirgo a hher pex du lei a, yaa ddei meixr maelmaerjjia leil hier dae a ddeix a, Zibixl deixrgoxr hher dae a, Zibixl leil ddaexr. ⁶ Zibixl su ca mel dder ca leil miardal a Zixrjiaxr mermi ssi a Yuesuyal leil i ssi lol a, bbeix: “Worga leil hher dae Yalmoxrlixl su ca mel

ddei zzirmar maelmaerjjia hher pex du lei a, ngua leil ddaexr lei a. Yel ni, ni leil vissersu leil nr guaxr bei nr ddo! Ni leil qiuxr, nialngasael ddeix lei a, ngua leil jiuxl lei, ngua leil beijjiu lei,” eine bbeix a. ⁷ Yel Yuesuyal dder yaa ddei meixr maelmaerjjia leil hier dae, halae yarzi ddaexr sexr meixr maelmaerjjia leil hier dae a, Zixrjiaxr mermi ddux a, ddeix a. ⁸ Yihexrhuaxr Yuesuyal leil bbeix: “Yaa leil gexr nr ssa; ngo mel yaa leil ni leixrga gga jia ji gger ho a; yaa ni meixsaer qir leil ngier ver xie su ar ddei nr zza.” ⁹ Yuesuyal Zixrjiaxr mermi ddux a, jjiumo cir xixl ssi a, neixleixrsael yaa dax halmaex ddeix ci a. ¹⁰ Yihexrhuaxr yaa leil Yirsaexllixl su ca mel meixsaer qir leil luaxl du lei lol. Yuesuyal Zibixl halmaex gga yaa leil daxlgaxldaxllixl ar zzu seixl zil gger a. Yaa leil ggaxrmae a, Boxrhexrluixr mermi dexbbor ddeix dae jjiumo zex gga yaa leil seixl a, Yalxijia nei Marzidaxl dax zzezze ci. ¹¹ Yaa Yirsaexllixl su ca mel meixsaer qir leil pa du si a. Yaa Boxrhexrluixr mermi zilbbor zei car, Yihexrhuaxr merlabbor wortaexlaex vaervaer lei zei lei lol a, yaa ggecir leil lei deix gger, Yalxijia mermi zzezze lei ci a, yaa leil deil zil gger a. Wortaexlaex deil zil gger mel, bir Yirsaexllixl su ca mel altor sser a seixl zil gger mel leil lei miur leixl.

¹² Yihexrhuaxr Yalmoxrlixl su ca mel leil Yirsaexllixl su ca mel leil jia ji gger hal cir ni, Yuesuyal Yihexrhuaxr dax ddar biar, yar Yirsaexllixl su ca mel meixsaer qir leil bbeix: “Merni, ni Zibixl zzi dax nor dae nia! Xiubbo, ni Yalyarluixr laggiex dax nor dae nia!” eine bbeix a.

¹³ Yel merni taex nor dae a; xiubbo taex lei nor dae a; Yirsaexllixl su ca mel yaa leil dir su mel leil bei koxl xixl jjia zzezze ci a. Nrnnga miar eil jji doxl Yarsar' er sul ber leil vaexr deix dae zzarmar? Merni taex merlabbor gga nor dae a, jjurjiur-maemae lal nr zei, cir ni sael zza a. ¹⁴ Yihexrhuaxr mel Yirsaexllixl su ca mel leil weix a zaxlddaexr. Yel eilni xilmeir leil nei eilni giedae leil lei, Yihexrhuaxr ca mel qiuxr dae mel leil noni a eilni sael a eine noni nr goxr!

¹⁵ Giedae Yuesuyal nei Yirsaexllixl su ca mel Zixrjiaxr mermi jjixr ci a.

Yalmoxrlixl Su Ca Ddei Zzirmar Ngorler Leil Yargol Ssu Si Lei

¹⁶ Zzirmar hal ngorler beix du si a, Marzidaxl zzi dax naer ggie doxli gga pahher dae. ¹⁷ Ca ar mel a Yuesuyal leil bbeix gger a bbeix: “Zzirmar hal ngorler leil zo wo ho a; maelmaerjjia lei Marzidaxl zzi dax naer ggie doxli gga pahher dae.” ¹⁸ Yuesuyal bbeix: “Nia legelbbe vaervaer nr pir sael va si lei a, doxli ddir ggie ddaexrcir gger a, ca leil miardal a su dae lol, ¹⁹ nia nael dawo nr ddo, nia leil dir su mel leil ggaxrmae ssi nia, yaa giedaebbaer ssi dae ca mel leil deil a, yaa leil seixl nia. Yaa leil armael ddei zzi gga ddir lol nr ddo, nia ddei Arbosobo Yihexrhuaxr mel yaa leil nia leixrga gga jia ji gger ho a.” ²⁰ Yuesuyal nei Yirsaexllixl su ca mel, yaa leil dir su ca daxlgaxl-daxllixlseixl ar mel seixl zil gger a; seixl nr wo ca mel nael, zzi sseissei mel gga pa dil si a. ²¹ Yirsaexllixl su ca mel dder zzasoso arla yaa hher ggie Marzidaxl zzi gga Yuesuyal dax halmaex jjixr ci a. Hane cirdae, zeixleixr lei Yirsaexllixl su ca mel leil bota bel su ca ar ddei nr zza a.

²² Giedae Yuesuyal bbeix: “Doxli ddir ggie ddaexrcir dae legelbbe mel va kae a, zzirmar hal ngorler leil doxli ddei gga hier teixl lei a, ngo meixsaer qir leil hier mal la,” eine bbeix a. ²³ Yel cassorworsor mel dder eilmel sael a bei a, zzirmar hal ngorler leil, hherdder Yiluxlsaler zzirmar, Xiboxrluixr zzirmar, Yimoxl zzirmar, Lajixr zzirmar nei Yiziluixr zzirmar leil doxli ddei gga hier teixl lei a, Yuesuyal meixsaer qir leil hier mal a. ²⁴ Yaa zzirmar hal ngorler leil hier teixl lei a, Yuesuyal dax halmaex ssi ci car, Yuesuyal dder Yirsaexllixl su ca mel leil ae si lei a, yar dax cirter a ssi su meixr guaxr su vaervaerpor hal mel leil bbeix: “Nia xilmeirbbaer lei a, qihher ddei zzirmar eilmel ddei leibbei leil jjiux gex dae,” eine bbeix a. Yaa dder xilmeirbbaer lei a, qihher ddei zzirmar eilmel ddei leibbei leil jjiux gex dae a. ²⁵ Yuesuyal yaa leil bbeix: “Yihexrhuaxr mel nia ddaexr ssi nia, nia leil dir su hazza leil eilmel sael a seixl zil gger nia. Yel nia gexr nr ssa, zzilzzil-zzerzzer zza nr ssa, hhelhhelmo nixmox vaervaermo nga nia,” eine bbeix a. ²⁶ Giedae, Yuesuyal dder zzirmar eil ngorler leil seixl zil gger a, ggecir mel sixzzer ngor

zwei leil gaxl gex gger a. Yaa leil dder sixzwei zwei leil gaxl gex dae a, mercixl zezze ci a. ²⁷ Merni lal niazzir dae car, Yuesuyal miardal a gie, ca mel dder ggecir mel sixzwei zwei leil vei zei lei a, yaa pahher goxr doxzi ddei gga piar ji gger a, legelbbe vaervaer nr pir sael doxzi ddir ggie ddaexrcir gger a. Legelbbe hal mel eilni zezze lei zza dae seir.

Yuesuyal Naxrfa Piar A Gga Zzi Mel Leil Ddaexr Leixl Gger

²⁸ Hal cir ni, Yuesuyal Marzidaxl zzi ddei leil su si lei a; yar zzi ddei gga ca mel leil nei zzirmar ddei leil seixl zil gger a; zzi ddei gga ca maelmaerjgia leil seixl zil gger a; cir ddei lei nr gol dae a. Yar Marzidaxl zzirmar ddei leil bei dae mel, hherdder halleix Yilixlge zzirmar ddei leil bei dae mel dax ciryoxr a nga. ²⁹ Eine goxr ho a, Yuesuyal nei Yirsaexllixl su ca mel Marzidaxl zzi gga ddux a, Lixlnaxr zzi gga ssi a, Lixlnaxr zzi ddei leil ddaexr ssi. ³⁰ Yihexrhuaxr Lixlnaxr zzi ddei leil nei Lixlnaxr zzi ddei zzirmar ddei leil lei Yirsaexllixl su ca mel leixrga gga jia ji gger a. Yuesuyal zzi eil ddei leil ddaexr a, zzi gga ca maelmaerjgia leil seixl zil gger a; cir ddei lei nr gol dae a. Yar Lixlnaxr zzirmar ddei leil bei dae mel, hherdder halleix Yilixlge zzirmar ddei leil bei dae mel dax ciryoxr a nga.

³¹ Yuesuyal nei Yirsaexllixl su ca maelmaerjgia Lixlnaxr zzi gga ddux lei a, Lajixr zzi gga ssi a. Yaa Lajixr deixrgoxr hher dae a, zzi eil ddei leil ddaexr. ³² Yihexrhuaxr Lajixr zzi ddei leil Yirsaexllixl su ca mel leixrga gga jia ji gger a. Giedae cir ni, Yuesuyal dder Lajixr zzi ddei leil su si lei a; yaa zzi ddei gga ca maelmaerjgia leil seixl zil gger a; hherdder Lixlnaxr zzi ddei leil bei dae mel dax ciryoxr a nga. ³³ Halcar, Zisexl zzirmar Hexllaxr mermi gga cirdae ddeix lei a, Lajixr zzi ddei leil beijjiu lei a. Yuesuyal dder yar leil nei yar ddei ca maelmaerjgia leil seixl zil gger a; cir ddei lei nr gol dae a.

³⁴ Yuesuyal nei Yirsaexllixl su ca maelmaerjgia Lajixr zzi gga ddux lei a, Yiziluixr zzi gga ssi a, Yiziluixr zzi ddei deixrgoxr hher dae a, zzi eil ddei leil ddaexr. ³⁵ Yaa hal cir ni dder zzi ddei leil su si lei a, zzi ddei gga ca mel leil seixl zil gger a. Hal cir ni, Yuesuyal zzi ddei gga ca maelmaerjgia leil seixl zil jia gger a; hherdder yar Lajixr zzi

ddei leil bei dae mel dax ciryoxr a nga. ³⁶ Yuesuyal nei Yirsaexllixl su ca maelmaerjjia Yiziluixr zzi gga ddux lei a, Xiboxrluixr zzi gga ddeix a, zzi eil ddei leil ddaexr. ³⁷ Yel yaa Xiboxrluixr zzi nei Xiboxrluixr zzi maelleil kax maelmaerjjia leil su si lei a. Yaa yoxl zzi gga ddei ca mel leil nei zzirmar ddei leil, halae kax gga ca mel leil, maelmaerjjia lei seixl zil gger a; cir ddei lei nr gol dae a; hherdder Yiziluixr zzi ddei leil bei dae mel dax ciryoxr a nga.

³⁸ Eine goxr ho a, Yuesuyal nei Yirsaexllixl su ca maelmaerjjia Dirbixl zzi gga jjixr ci a, zzi eil ddei leil ddaexr. ³⁹ Yel yaa Dirbixl zzi nei Dirbixl zzi maelleil kax maelmaerjjia leil su si lei a. Yaa yoxl zzi gga ddei ca mel leil nei zzirmar ddei leil, halae kax gga ca mel leil, maelmaerjjia lei seixl zil gger a; cir ddei lei nr gol dae a; hherdder yar Xiboxrluixr zzi nei Lixlnaxr zzi, halae Lixlnaxr zzirmar ddei leil bei dae mel dax ciryoxr a nga.

⁴⁰ Eine bei a, Yuesuyal middei maelmaerjjia ddei ca mel leil seixl zil gger a; hherdder worga leil hher dae, naxrfa piar a gga hher dae, mipaerbbae darmumu ggie hher dae nei worlelzir leil hher dae ca maelmaerjjia, halae middei hal mel ddei zzirmar mel lei cir ddei lei nr gol dae a. Seixl ho dae hazza leil seixl zil jjia gger a; hherdder Yirsaexllixl su ca mel ddei Arbosobo Yihexrhuaxr miardal dae mel sael a nga. ⁴¹ Yuesuyal Jiadirsibanixryal mermi cirdae a Jiasar zzi gga ddaexr ci, yoxl Gesa mermi maelmaerjjia leil ddaexr a, Zibixl zzi zzeze ddaexr ci. ⁴² Yirsaexllixl su ddei Arbosobo Yihexrhuaxr mel Yirsaexllixl su ca mel leil weix a zaxl ddaexr. Yel Yuesuyal cirleixr dder zzirmar maelmaerjjia leil ddaexr leixl gger a, seixl zil gger a; halae yaa ddei middei mel leil li wo a. ⁴³ Yel Yuesuyal nei Yirsaexllixl su ca maelmaerjjia Zixrjiaxr mermi yaa hher ggie jjixr ci a.

Yuesuyal Yibixl Leil Nei Yar dax Cirgo A Bei Su Goxrjia Mel Leil Ddaexr Leixl Gger

11 ¹ Xiaxlsor zzirmar Yibixl mel Yirsaexllixl su ca mel zaxl ddaexr leixl a jjixr lei ggie bbejjiur a, yel dder ca leil miardal a, Marduixl zzi ddei zzirmar Yueba, Seluixr zzi ddei zzirmar, Yasaxl zzi ddei zzirmar, ² nei baexrfa piar a gga ddei worga leil, Zinixrlixl

ddei naxrfa piar a gga Yallaba halmaex middei darmumu bbaelerler mel leil, halae xifa piar a gga Do'aer worlelzir leil hher dae zzirmar mel leil i ssi lol. ³Yoxl dofa piar a gga nei xifa piar a gga ddei Jianaxr su ca, worga leil hher dae Yalmoxrlixl su ca, Hexl su ca, Birlixlxir su ca, Yibuxlsi su ca, halae Hiemexr worga ddei worjibbei dax Mirsiba mermi ddei Xiweixl su ca mel leil i ssi lol. ⁴Zzirmar eilmel nei yaa ddei meixr maelmaerjjia lei ddux lei a; ca mel neixvi qir leil sa mel sael a miur, halae mur nei marcae hormo zza. ⁵Zzirmar eilmel cirgo a hher pex a, Mirluixr vixiur qir leil ssi ci a, cirgo a hher dae a, Yirsaexllixl su ca mel dax zaxlddaexr niazzir dae a.

⁶Yihexrhuaxr Yuesuyal leil bbeix: “Ni yaa leil gexr nr ssa. Arggeni eilcar, ngo yaa leil Yirsaexllixl su ca mel leixrga gga jia ji gger a seixl zil jjia gger lol nia. Ni yaa ddei mur mel ddei zzur mel leil taexl te gger nia, yaa ddei zaxlddaexr a sserddu marcae mel leil cu pixl gger nia.” ⁷Yel Yuesuyal meixr maelmaerjjia leil hier dae a, Mirluixr vixiur qir leil neixleixrsael yaa leil ddaexr. ⁸Yihexrhuaxr yaa leil Yirsaexllixl su ca mel ddei leixrga gga jia ji gger a, Yirsaexllixl su ca mel dder yaa leil seixl, yaa leil ggaxrmae dae a, Xiduixl zzi vaervaer ddei dax nei Mirsilixlfuxr-Maryi mermi ggaxrmae ci a; dofa piar a gga Mirsiba mermi bbaelerler ggie zzezze lei ggaxrmae ci a, yaa leil seixl zil gger a, cir ddei lei nr gol dae lol a. ⁹Yuesuyal dder Yihexrhuaxr yar leil miardal dae mel sael a bei a, yaa ddei mur mel ddei zzur mel taexl te gger; zaxlddaexr a sserddu marcae mel cu pixl gger.

¹⁰Giedae, Yuesuyal pox xixl lei a, Xiaxlsor zzi ddei leil su si lei a, zzirmar ddei leil seixl zil gger a. (Halleix, Xiaxlsor zzi ddei mel zzirmar mel guaxr dae mel gga vaer zzir zzi ddei nga a.) ¹¹Yirsaexllixl su ca mel zzi gga ddei ca mel leil seixl a, seixl zil jjia gger a; ha seixl ho dae mel dder cir ddei lei nr gol dae a. Yuesuyal yoxl Xiaxlsor zzi ddei leil cu pixl gger a. ¹²Yuesuyal zzirmar eilmel ddei zzi maelmaerjjia leil su si lei a, zzirmar mel leil ssu si lei a. Yar Yihexrhuaxr leil visser su Moxrxi miardal dae mel dax zox dae a, zzirmar maelmaerjjia leil seixl zil jjia gger a. ¹³Yirsaexllixl su ca mel wordabbor zi deix dae zzi mel leil cir ddei lei cu pixl nr gger; Yuesuyal Xiaxlsor

zzi ddei leil lar cu pixl gger. ¹⁴ Yirsaexllixl su ca mel zzi hal mel gga zzirbae nei zzaegu, halae zzeir maelmaerjjia leil su si lei a, armael ddei bei a. Ca maelmaerjjia leil lei seixl zil gger a, cir ddei lei nr gol dae lol a. ¹⁵ Yihexrhuaxr yar leil visser su Moxrxi leil arsae miardal mel, Moxrxi dder hal mel sael a Yuesuyal leil miardal a, Yuesuyal lei hal mel sael a bei a. Yihexrhuaxr Moxrxi leil miardal dae hazza, Yuesuyal nr bei lei ar jji nr zza.

Yuesuyal Middei Mel Leil Li Wo

¹⁶ Yuesuyal middei hal mel leil maelmaer ddaexr leixl gger a, su si lei a. Hherdder: worga leil middei mel, naxrfa piar a gga ddei middei hazza; Gesa mermi maelmaerjjia; middei darmumu bbaelerler mel; Yallaba mermi, Yirsaexllixl mermi worga leil hielmi mel nei worjibbei dax middei darmumu bbaelerler mel nga a. ¹⁷ Xi'aer ddeix ggie Hala worga dax cirdae a, Hiemexr worjibbei dax Lixrbanexl bbaelerler ggie Balixl-Jiadaexr mermi zzezze; halae middei hal mel ddei zzirmar mel leil ssu si lei a, yaa leil seixl zil gger. ¹⁸ Yuesuyal mel zzirmar eilmel dax hormo nixixl ddaexr a. ¹⁹ Zibixl zzi gga ddei Xiweixl su ca mel leil cuxrteixl a, Yirsaexllixl su ca mel dax toltor a bei bbeix lei su zzi lei ar ddei nr zza. maelmaerjjia leil Yirsaexllixl su ca mel zaxlddaexr a, su si lei. ²⁰ Yihexrhuaxr xiar dae ddei mel dder yaa leil nixmox gex lol a, Yirsaexllixl su ca mel dax zaxlddaexr lei lol a, yaa leil seixl zil jjia gger lol, zoxlnixr su nr zza lol, hherdder Yihexrhuaxr Moxrxi leil miardal dae mel sael a nga.

²¹ Halcar, Yuesuyal yoxl meixr mel leil hier dae a ddux a, Xiboxr-luixr zzi, Dirbixl zzi, Yalnaxrboxr zzi, Yirsaexllixl mermi nei Yoxrdaxl worga leil hherdae Yalnaxl cuxr ddei ca mel leil bei zil jjia gger a; yaa ddei zzi maelmaerjjia lei bei xiaxr gger a. ²² Yirsaexllixl mermi Yalnaxl cuxr ddei ca cir ddei lei nr gol dae a; Jiasaxl mermi, Jiatexl mermi, Yalsixrtu mermi larnei Yalnaxl cuxr ddei ca ar mel zza a. ²³ Yel Yuesuyal mel Yihexrhuaxr Moxrxi leil miardal dae mel sael a bei a, middei maelmaerjjia leil ddaexr leixl gger a, Yirsaexllixl su circuxr-circuxr dax zox dae a, middei mel yaa leil bbe gger a. Yel yaa hher ggie dder zzasoso a nga a; zaxl-nr-ddaexr a.

Moxrxi Ddaexr Leixl Gger Zzirmar Mel

12 ¹Yirsaexllixl su ca mel Yuedaxl lazzarmo dax merni ddux ggie zzirmar nnel leil seixl a, yaa ddei middei mel leil li wo a. Hherdder Yalnexl lagiex cir ddei a Hiemexr worgga ssi ci, halae dofa piar a gga Yalaba mermi maelmaerjjia ca dae a. ²Zzirmar eil nnel gga, Xisixrber zzi gga Yalmoxrlixl su ca mel ddei zzirmar Xi-hoxr ca dae. Yar guaxr dae middei mel mel Yalnexl lagiex qir leil Yalloxr'aer zzi cirdae a, lagiex gga zzi mel, halae Zilixl mermi cir peix a Yalmae su ca ddei middei yarqir leil Boxryar lazzarmo zze-zze ssi ci. ³Yar guaxr dae middei mel Yuedaxl lazzarmo lagiex gga dofa piar a gga jiujiu: Jialixllixl neixvi dax cirdae a Yallaba neixvi dax ssi ci, hherdder cor zza neixvi dax cirdae a, Boxr-Yiximoxl nei Pirsijia worga dax zzezze ssi ci. ⁴Kebal zzirmar hal ddei nael, Basa mermi ddei zzirmar Exl, yar mel Lixlfaryi su ca mel gga gol zei lei a, Yalsitaluxl nei Yirdaexrlaexr mermi hher dae. ⁵Yar guaxr dae middei mel dder Hiemexr worga, Sarjia zzi, Basa mermi maelmaerjjia dax cirdae a, Zisuxl su ca nei Marjia su ca mel ddei middei yarqir leil zzezze ssi ci, halae Zilixl mermi cir peix a, Xisixrber zzi ddei zzirmar Xi-hoxr ddei middei yarqir leil zzezze ssi ci. ⁶Yihexrhuaxr leil visser su Moxrxi Yirsaexllixl su ca mel leil hier dae a, zzirmar eil nnel leil ddaexr leixl gger a. Moxrxi yaa ddei middei mel Liurbixl ddei cuxr leil, Jiadaexr ddei cuxr leil nei Marnaxrsi ddei cuxr gga ca cir peix leil bbe gger a, yaa li wo mibbe middei mel bei lol.

Yuesuyal Ddaexr Leixl Gger Zzirmar Mel

⁷Yuesuyal nei Yirsaexllixl su ca mel Yuedaxl lazzarmo xifa piar a gga zzirmar mel leil seixl zil gger a. Yaa ddei middei mel mel Lixrbanel mermi middei bbaelerler gga Balixl-Jiadaexr cirdae a, Xi'aer mermi Hala worga leil ddeix ci. Yuesuyal dder middei hal mel Yirsaexllixl ddei cuxr mel dax zox dae a, yaa leil bbe gger a, yaa li wo mibbe middei mel bei lol: ⁸hherdder Hexl su ca, Yalmoxrlixl su ca, Jianaxr su ca, Birlixlxir su ca, Xiweixl su ca, Yibuxlsi su ca mel ddei wordabor middei mel, Yalaba mermi middei darmumu bbaelerler

mel, dexbbor mel, mipaerbbae mel nei naxrfa piar a gga middei mel nga a. ⁹ Yaa ddei zzirmar mel: cir ddei a nael Yilixlge zzi ddei zzirmar, cir ddei a nael Boxrtexllixl dax naer dae Aexl zzi ddei zzirmar, ¹⁰ cir ddei a nael Yiluxlsaler zzi ddei zzirmar, cir ddei a nael Xiboxr-luixr zzi ddei zzirmar, ¹¹ cir ddei a nael Yimoxl zzi ddei zzirmar, cir ddei nael Lajixr zzi ddei zzirmar, ¹² cir ddei a nael Yiziluixr zzi ddei zzirmar, cir ddei a nael Zisexl zzi ddei zzirmar, ¹³ cir ddei a nael Dir-bixl zzi ddei zzirmar, cir ddei a nael Zidexr zzi ddei zzirmar, ¹⁴ cir ddei a nael Hexr'ermar mermi ddei zzirmar, cir ddei a nael Yalldexr zzirmar, ¹⁵ cir ddei a nael Lixlnaxr zzi ddei zzirmar, cir ddei a nael Yalduxllaxr zzi ddei zzirmar, ¹⁶ cir ddei a nael Marzidaxl zzi ddei zzirmar, cir ddei a nael Boxrtexllixl zzi ddei zzirmar, ¹⁷ cir ddei a nael Tapuryal zzirmar, cir ddei a nael Xifuxr zzirmar, ¹⁸ cir ddei a nael Yalfuxr zzirmar, cir ddei a nael Lasaluixr zzirmar, ¹⁹ cir ddei a nael Marduixl zzirmar, cir ddei a nael Xiaxlsor zzi ddei zzirmar, ²⁰ cir ddei a nael Seluixr-mirluixr zzi ddei zzirmar, cir ddei a nael Yasar zzirmar, ²¹ cir ddei a nael Tanaxl zzi ddei zzirmar, cir ddei a nael Mirzixrdo mermi ddei zzirmar, ²² cir ddei a nael Zidirsi zzirmar, cir ddei a nael Jiamixl worga dax naer dae Yuenixl zzirmar, ²³ cir ddei a nael neixvi qir leil Do'aer zzi ddei zzirmar, cir ddei a nael Zixrjiaxr mermi ddei zzirmar Geyixl, ²⁴ cir ddei a nael Dexrsar zzi ddei zzirmar. Zzirmar maelmaerjjia a mel soceicir ddei zza.

Li-Nr-Wo Seir Middei Mel

13 ¹ Yuesuyal koxltor mar a; Yihexrhuaxr yar leil bbeix: “Ni koxltor mar ho a; nael halae li-nr-wo middei hormo zza seir, ² hherdder Feilixlsixl su ca mel ddei middei maelmaerjjia nei Zisuxl su ca mel ddei middei maelmaerjjia. ³ Aezixr dofa piar a gga Xi-hexr lazzarmo dax cirdae a, baexrfa piar a gga Yirgexrluixr yarqir leil zzeze ci. Eimel maelmaerjjia lei Jianaxr mermi suax, eimel mel, Jiasar su ca, Yalsixrtu su ca, Yalsixrziluixr su ca, Jiatexl su ca nei Yirgexrluixr su ca mel leil guaxr su Feilixlsixl su vaervaerpor ngorler ddei middei a; halae naxrfa piar a gga Yalweixl su ca mel ddei middei a. ⁴ Yoxl Jianaxr su ca mel ddei middei maelmaerjjia,

halae Xiduixl su ca mel ddei Miryalla cirdae a Yalfuxr dax ci, yoxl Yalmoxrlixl su ca mel ddei middei yarqir leil zzeze ci. ⁵ Yoxl Jiaballexl su ca mel ddei middei, halae dofa piar a gga Lixrbanexl mermi maelmaerjjia, hherdder Hiemexr worjibbei dax Balixl-Jiadaexr dax cirdae a, Hamarker dax zzeze ci. ⁶ Wordabbor goxr dae ca maelmaerjjia, Lixrbanexl mermi cirdae a Mirsilixlfuxr-Maryi zzeze ci, hherdder Xiduixl su ca maelmaerjjia nga a. Ngo arsae bei lei Yirsaexllixl su ca mel meixsaer qir leil yaa leil ggaxr teixl gger. Ni, ngo ni leil miardal dae mel dax zox dae a, mermi eil ddei Yirsaexllixl su ca mel leil bbe gger a yaa leil li wo lol a dder ddo a. ⁷ Eilcar ni middei eil ddei kebal hal ge cuxr leil nei Marnaxrsi ddei cuxr gga ca cir peix leil bbe gger a yaa leil li wo lol,” eine bbeix.

Yuedaxl Lazzarmo Ddei Dofa Piar A Gga Middei Mel Bbe

⁸ Marnaxrsi ddei cuxr gga ca cir peix nei Liurbixl ddei, Jiadaexr ddei eil nr cuxr, Yihexrhuaxr leil visser su Moxrxi Yuedaxl lazzarmo dofa piar a gga, yar leil bbe gger dae middei mel li wo ho a. ⁹ Yaa ddei middei mel Yalnexl lagiex qir leil Yalloxr'aer zzi nei lagiex gga zzi mel, halae zzi dax middei bbaelerler ggie cirdae a, Dirber zzi zzeze ci; ¹⁰ halae Xisixrber zzi gga, Yalmoxrlixl su ca mel ddei zzirmar Xihoxr guaxr dae zzi cirddei-hanga dax cirdae a, Yalmae su ca mel ddei middei yarqir leil zzeze ci; ¹¹ Yoxl Zilixl mermi, Zisuxl su ca nei Marjia su ca mel ddei middei mel jiujiu, halae Hiemexr worga maelmaerjjia, Basa mermi maelmaerjjia dax cirdae a, Sarjia zzi zzeze ci; ¹² yoxl Basa mermi ddei zzirmar Exl ddei goxrjia cirddei-lorbba. Yar Yalsitaluxl mermi nei Yirdaexrlaexr mermi zzirmar bei. Lixlfaryi su ca mel gga yar lar gol dae a. Moxrxi mel, kebal Lixlfaryi su ca mel leil ddaexr leixl gger a, ggaxr teixl gger a. ¹³ Nael Yirsaexllixl su ca mel zrael, Zisuxl su ca nei Marjia su ca mel leil ggaxr teixl nr gger, ca eilmel eilni zzeze lei Yirsaexllixl su ca mel gga goxr ji dae.

¹⁴ Lixlweixl ddei cuxr larni, Moxrxi yaa leil middei bbe nr gger. Yaa li wo mibbe mel mel adoxl gga cu a Yirsaexllixl su ca mel ddei

Arbosobo Yihexrhuaxr leil zi dae mel nga a; hherdder Yihexrhuaxr yaa leil gger nia bbeix har zaxr dae mel sael a nga.

Liurbixl Ddei Cuxr Leil Bbe Gger Dae Middei Mel

¹⁵ Moxrxi Liurbixl ddei cuxr gga, jiacuxr mel dax zox dae a, yaa leil li wo mibbe middei mel bbe gger. ¹⁶ Yaa bbe wo middei mel mel Yal-nexl lagiex qir leil Yalloxr'aer zzi nei lagiex gga zzi mel, halae Midir-ba zzi dax naer dae middei bbaelerler maelmaerjjia; ¹⁷ yoxl Xisixrber zzi nei Xisixrber zzi dax middei bbaelerler ggie zzi maelmaerjjia, hherdder: Dirber, Bamoxl-Balixl, Boxr-Balixl-Mir, ¹⁸ Yarzaxr, Zidirmoxl, Mirfaxrya, ¹⁹ Zilixltixr, Xibirmar, lagiex gga worga leil Xixllixlha-Saxiaxr, ²⁰ Boxr-Pir'aer, Pirsijia dexbbor ddeix dae mel, Boxr-Yiximoxl; ²¹ middei bbaelerler ggie zzi cirddei-hanga nei Yal-moxrlxl su ca mel ddei zzirmar Xihoxr ddei goxrjia cirddei-lorbba nga a. Xihoxr mel halleix Xisixrber zzi gga zzirmar bei, Moxrxi yar leil nei Mirdixl mermi ddei vaervaerpor Yirmoxl, Lixlji, Su'aer, Ful'aer nei Lixlba leil seixl zil gger a. Eilmel maelmaerjjia lei middei halmaex gga goxr dae Xihoxr woxrke vaervaerpor mel nga a. ²² Yir-saexllixl su ca mel seixl zil gger ca mel gga, Bir'aer ddei ssor saxr-miexrsu Balaxr lei ca dae. ²³ Liurbixl ddei cuxr ddei middei mel Yuedaxl lazzarmo zex zzeze ci. Ggaxrsibbor eilmel mel, Liurbixl ddei cuxr, jiacuxr dax zox dae a bbe wo zzi nei kax mel nga a.

Jiadaexr Ddei Cuxr Leil Bbe Gger Dae Middei Mel

²⁴ Moxrxi Jiadexr ddei cuxr gga, jiacuxr mel dax zox dae a, yaa leil li wo mibbe middei mel bbe gger. ²⁵ Yaa bbe wo middei mel mel, Yarxiexl zzi nei Zilixl mermi zzi cirddei-hanga, halae Yalme su ca mel ddei middei cir peix a, Laba mermi dax Yalloxr'aer zzi zzeze ci; ²⁶ Xisixrber zzi cirdae a Lamoxl-Mirsiba nei Birdonixr zzeze ci, yoxl Marhanixl zzi cirdae a, Dirbixl mermi yarqirbbaer zzeze ci; ²⁷ yoxl lagiex gga Boxr-Yallaxr, Boxr-Nixrla, Suge, Sarfei, hherdder Xisixrber zzirmar Xihoxr ddei goxrjia gga kebal middei mel, halae Yuedaxl lazzarmo dax zzeze dofa piar a gga cirdae a, Jialix-

lixl neixvi ollele zzeze ci. ²⁸ Ggaxrsibbor eilmel mel, Jiadaexr ddei cuxr, jiacuxr dax zox dae a bbe wo zzi nei kax mel nga a.

Marnaxrsi Ddei Cuxr Gga Ca Cir Peix Leil Bbe Gger Middei Mel

²⁹ Moxrxi Marnaxrsi ddei cuxr gga ca cir peix leil bbe gger dae li wo mibbe middei mel, yaa ddei jiacuxr dax zox dae a bbe. ³⁰ Yaa bbe wo middei mel mel, Marhanixl zzi cirdae a, Basa mermi maelmaerjjia ca dae, hherdder Basa mermi ddei zzirmar Exl ddei goxrjia cirddei-lorbba, halae Basa mermi gga Yar'aer guaxr dae zzi qiuxlceimo. ³¹ Zilixl mermi cir pex nei Basa mermi ddei zzirmar Exl guaxr dae Yalsitaluxl nei Yirdaexrlaexr zzi hal nnel nga a. Middei eilmel mel, jiacuxr dax zox dae a, Marnaxrsi ddei cuxr gga ca cir peix leil bbe gger a. Ca eil peix mel Marnaxrsi ddei ssor Marzixr ddei giedae ca a.

³² Ggaxrsibbor eilmel mel, Moxrxi Yilixlge zzi deixrgoxr Yuedaxl lazzarmo dofa piar a gga, Moxrya mermi middei bbaelerler ggie hher dae a, Yirsaexllixl su ca mel leil bbe gger dae middei mel nga a. ³³ Lixlweixl ddei cuxr li wo mibbe ddei mel, Yirsaexllixl su ddei Arbosobo Yihexrhuaxr nga a; hherdder Yihexrhuaxr yaa leil gger nia bbeix har zaxr dae mel sael a nga. Yel Moxrxi Lixlweixl ddei cuxr leil middei bbe nr gger.

Yuedaxl Lazzarmo Xifa Piar A Gga Middei Mel Bbe

14 ¹ Jiasibbor vaexr dae mel mel, Arbosobo leil zi su Yirlixlyalsar nei Nexl ddei ssor Yuesuyal, halae Yirsaexllixl su ca circuxrhanga ddei vaervaerpor mel, Jianaxr mermi gga Yirsaexllixl su ca mel leil bbe gger middei mel nga a. ² Yaa Yihexrhuaxr Moxrxi leil miardal dae mel dax zox dae a, middei mel nijiu a, ge cuxr peix leil bbe gger. ³ Moxrxi mel Yuedaxl lazzarmo dofa piar a gga ddei middei mel, Liurbixl ddei cuxr, Jiadaexr ddei cuxr nei Marnaxrsi ddei cuxr gga ca cir peix leil bbe gger ho a. Nael Lixlweixl ddei cuxr leil middei bbe nr gger. ⁴ Yuesaexl ddei giedae ca mel nr cuxr loxr a; hherdder Marnaxrsi cuxr nei Yirfaxrlixr cuxr nga a. Lixlweixl ddei cuxr leil middei bbe nr gger, nael yaa hher ggie zzi zza, zzi maelleil

zzeir loxl ggie nei zzaegu dol ggie zza. ⁵ Yirsaexllixl su ca mel Yihexrhuaxr Moxrxi leil miardal dae mel dax zox dae a, middei eilmel bbe.

Jialexl Xiboxrluixr Mermi Ddei Bbe Wo

⁶ Cir ni a, Yoxrdaxl ddei cuxr gga ca ar mel a Zixrjiaxr zzi gga lei a, Yuesuyal leil i lei. Zinixrxir su ca Yifuxrnixr ddei ssor Jialexl lei ca dae. Yar Yuesuyal leil bbeix: “Jiadirsi-Banixryal hher dae car, Yihexrhuaxr yar leil visser su Moxrxi dax ni leil nei ngo leil bbeix dae ddar mel mel ni saexl. ⁷ Yihexrhuaxr leil visser su Moxrxi Jiadirsi-Banixryal mermi gga, ngo leil miardal a middei eil ddei leil ker i lei lol halcar, ngo jiajia licei koxl loxr a; ngo, ngo nixmox zzar xiar dae mel dax zox dae a yar leil ngo mia mel bbeix gger a. ⁸ Ngo dax cirgo a ddeix su arzzi-nimar mel bbeix gger dae mel zzael, cassor-worssor mel leil ceirceir-laexlaex gexr mal lol, nael ngo mel, nixmox cirtaex-lorbba ngo ddei Arbosobo Yihexrhuaxr dax mae dae. ⁹ Hal cir ni Moxrxi ngo dax bbeix har zaxr a bbeix: ‘Ni mel nixmox cirtaex-lorbba ngo ddei Arbosobo Yihexrhuaxr dax mae dae, yel ni qihher toxl goxr middei mel arddolcar ci a lei ni nei ni giedae ca mel leil gger nia,’ eine bbeix a. ¹⁰ Yihexrhuaxr Moxrxi dax bbeix har zaxr dae mel dax zox dae a, yoxl ngo leil licei ngor koxl gol lol a; nixixl eilmel gga ngo Yirsaexllixl su ca mel dax cirgo a hierbolpae gga hher dae. I ddo a! Eilcar ngo heixlcei ngor koxl loxr a; ¹¹ ngo halae sexr dae seir, Moxrxi ngo leil miardal a ssi lol hal cir ni sael a nga; zaxlddaexr bbeixsael ddirddir-dduxddux zzorbbeixlei, ngo ddei wor ddei halcar arsae nga mel, eilcar lei arsae nga. ¹² Eilcar a ni leil qiuxr, Yihexrhuaxr hal cir ni ngo leil gger nia bbeix har zaxr goxr mel dax zox dae a, wordabbor middei mel ngo leil gger la. Ni armael lei bbejjiur goxr a; halmaex mel Yalnaxl cuxr ddei ca hher dae, yaa ddei zzi mel mu zzae mu, ssei zzae ssei. Nael Yihexrhuaxr ngo dax hher dax dae arddeirnga a, ngo arsae bei lei yar bbeix har zaxr dae mel dax zox dae a, ca eilmel leil ggaxr teixl gger,” eine bbeix a.

¹³ Yel Yuesuyal dder Yifuxrnixr ddei ssor Jialexl leil seir lol bbeix gger a, Xiboxrluixr mermi ddei Jialexl leil bbe gger a, yar li wo mi-bbe bei lol a. ¹⁴ Zinixrsir cuxr gga ca Yifuxrnixr ddei ssor Jialexl mel, nixmox cirtaex-lorbba Yirsaexllixl su ca mel ddei Arbosobo Yihexr-huaxr dax mae dae, yel Xiboxrluixr mermi ddei mel eilleix zzeze lei yar giedae ca mel ddei a. ¹⁵ Halleix Xiboxrluixr mermi ddei leil mel Zilixl-Yalba ae; Yalba mel Yalnaxl cuxr ddei ca mel gga ca mel i du zzir ca ddei nga a. Eine cirdae, middei hal ddei gga dder toltor a nga a; zaxl-nr-ddaexr a.

Yoxrdaxl Ddei Cuxr Leil Bbe Gger Dae Middei Mel

15 ¹ Yoxrdaxl ddei cuxr gga Jiacuxr dax zox dae a, nijiu a bbe wo middei mel naxrfa piar a gga nael Yirido mermi yarqir leil cirdae a, Xuxr mermi hierbolpae naxrfa piar a gga ollele zzeze ci. ² Yaa ddei naxrfa piar a gga middei yarqir ddei mel, cor zza neixvi bbe naxrfa piar a gga cirdae a, ³ Yalkexllabi dexbbor ddei naxrfa piar a gga gger ci a Xuxr mermi dax zol gex dae a, Jiadirsi-Banixryal ddei naxrfa piar a dax ddeix ci, yoxl Xisiluixr leil lal gel a, Yaldaxr-'aer dax ddeix a, Jiaxrjia za gel a, ⁴ Yame zzi dax zol gex a, Aezixr lazzarmossor zex dax gger a, neixvi dax zzeze ci. Eimel mel dder yaa naxrfa piar a gga bbe wo dae mel nga a. ⁵ Dofa piar a gga mel cor zza neixvi bbe ddei naxrfa piar a gga cirdae a, Yuedaxl lazzarmo dax ci. Baexrfa piar a gga nael, Yuedaxl lazzarmo zex cor neixvi gga pe dil ggie halmaex cirdae a, ⁶ Boxr-Herla ddeix ci, yoxl Boxr-Yallaba ddei baexrfa piar a gga lal gel a, Liurbixl ddei ssor Bohar ddei legelbbe taex dax ddeix ci. ⁷ Yalge lagiex ddei baexrfa piar a gga cirdae a, Dirbixl dax ddeix ci a, lazzarmo ddei naxrfa piar a gga Yaldumir dexbbor ddei deixrgoxr Zixrjiaxr mermi dax zzeze ssi ci; yoxl Yir-Sixlmaexl lur bbe dax zol gex a, Yir-Loxrjixr zzeze ci, ⁸ Xinexlzir lagiex dax ddeix ci a, Yibuxlsi ddei naxrfa piar a gga ssi naer ci (Yibuxlsi mel dder Yiluxlsaler nga a), yoxl Xinexl lagiex xifa piar a gga ddei worga oldde dax ddeix ci, hherdder Lixlfaryi lagiex ddei baexrfa piar a gga olle zzir middei yarqir leil nga a. ⁹ Yoxl worga oldde leil cirdae a Nixrfuxrdoyal ddei lur bbe dax, Yirfuxr-

luixr worga ddei zzi mel dax ci, yoxl Bala dax zzeze ci (Bala mel dder Zilixl-Yilixr zzi ddei nga a). ¹⁰ Yoxl Bala cirdae a xifa piar a gga Xi'aer worga dax za ci a, Yilixr worga ddei baexrfa piar a gga zol gex (Yilixr mel dder Zisarluixr nga a). Yoxl Boxr-Sixlmaexl dax zei ci a Tixrnaxl gger a, ¹¹ Yirgexrluixr zzi baexrfa piar a gga worga dax gger ci a, zeixleixr Siziluixr zzi leil gger a, Bala worga dax zol gex; Bala worga dax ssi ci a, yoxl Yarbiriexl zzi dax gger ci a, yilzi a neixvi bbe dax zzeze ssi ci. ¹² Xifa piar a gga mel dder neixvi nei neixvi dax naer dae middei mel nga a. Eimel mel dder Yoxrtaexl su ca mel jiacuxr dax zox dae a, li wo middei mel ddei zaza-lili yarqir-bbaer mel nga a.

Jialexl Xiboxrluixr Mermi Nei Dirbixl Mermi Leil Ddaexr

¹³ Yuesuyal Yihexrhuaxr miardal dae mel dax zox dae a, Yoxrdaxl ddei cuxr bbe wo middei mel gga Zilixl-Yalba mermi ddei, Yifuxrnixr ddei ssor Jialexl leil bbe gger. Yalba mel Yalnaxlcuxr ddei porpor a. (Zilixl-Yalba mel dder Xiboxrluixr nga a.) ¹⁴ Jialexl dder halmaex gga hher dae Yalnaxl ddei ssor soler ddei giedae ca mel leil ggaxr teixl gger a; ca eimel hherdder Sixlsae ddei cuxr, Yalximaxl ddei cuxr nei Daxrmaer ddei cuxr mel nga a. ¹⁵ Yoxl halmaex gga ddeix a, Dirbixl zzi gga goxr dae ca mel leil ddaexr ssi. Dirbixl zzi eil ddei leil halleix Zilixl-Xifuxr bbeix. ¹⁶ Jialexl bbeix: “Arseir Zilixl-Xifuxr leil ddaexr ssi a, zzi ddei leil li wo a mel, ngo dder ngo ddei ssormaer Yasar leil yar leil fu gger a yar ddei maerssor bei lol.” ¹⁷ Jialexl ddei arzzi-nimar Zinaxlsi ddei ssor Exrtoxrniexl zzi hal ddei leil su si lei a. Jialexl dder yar ddei ssormaer Yasar leil yar leil fu gger a yar ddei maerssor bei lol. ¹⁸ Yasar leil fu car, yar, yar capor leil quex a yarbbor dax mi ar bbae li lol. Yel Yasar tarlodaex ddei leil zei a qie, Jialexl yar leil biex a bbeix: “Ni azo li?” ¹⁹ Yar bbeix: “Ni leil qiuxr, ngo leil seir lol la, ni ngo leil naxrfa piar a gga middei mel gga hher lol a mel, ni leil qiuxr, lur zer dae mel ngo leil gger la!” eine bbeix a. Yarbbor dder ggaxrsibbor lur zer dae nei jiasibbor lur zer dae mel yar leil gger a.

Yoxrdaxl Bbe Wo Zzi Mel

²⁰ Jiasibbor eimel mel, Yoxrdaxl ddei cuxr jiacuxr dax zox dae a bbe wo middei mel nga a: ²¹ Yoxrdaxl ddei cuxr naxrfa piar a gga olle zzir ggie, Yirdo mermi yarqir leil bbe wo zzi mel mel: hherdder Jiaxrxue, Yirdaexr, Yargu'aer, ²² Zinaxr, Dirmoxrnaxr, Yaldaxldaxr, ²³ Zidirsi, Xiaxlor, Yirtixrnaxr, ²⁴ Xifuxr, Tixrliexl, Biryalluxl, ²⁵ Xaxlor-Hadaxlta, Jialuxl-Xisiluixr (Jialuxl-Xisiluxr mel dder Xiaxlor nga a), ²⁶ Yaxlmaxl, Sixlmar, Moxrladaxl, ²⁷ Hasaxl-Jiadaxl, Hiesixrmexr, Boxr-Paxllixl, ²⁸ Hasaxl-Suyal, Bixrsixlba, Birsiyueta, ²⁹ Bala, Yiryi, Yirse, ³⁰ Yilexldolaxl, Zisi, Hexr'aexrmar, ³¹ Xirgexrla, Maexlmarnaxr, Sasarnaxr, ³² Lixlbawuxl, Sixrxi, Yalyi nei Lixrmexr. Maelmaerjgia a mel, zzi nrzei ge maex zza, halae zzi dax naer dae kax mel lei ca dae.

³³ Worlelzir leil zzi mel mel hherdder: Yisixrtoxr, Sorla, Yalsixrnaxr, ³⁴ Sarnoxryal, Yir-Ganixr, Tapuryal, Yirnaxr, ³⁵ Yimoxl, Yalduxllaxr, Soge, Yalxijia, ³⁶ Salayi, Yaldirtayi, Zidirla nei Zidirloxr-tayi. Maelmaerjgia a mel, zzi ceili maex zza, halae zzi dax naer dae kax mel lei ca dae.

³⁷ Yoxl Xirnaxr, Hadaxlsa, Maexldaxl-Jiadaexr, ³⁸ Dirlixr, Mirsiba, Yuetie, ³⁹ Lajixr, Bosijia, Yiziluixr, ⁴⁰ Jiaber, Lamaxl, Zitixrlixl, ⁴¹ Zidirloxr, Boxr-Daxlguir, Naxrmar nei Marzidaxl. Maelmaerjgia a mel, zzi ceiquixl maex zza, halae zzi dax naer dae kax mel lei ca dae.

⁴² Yoxl Lixlnaxr, Yirtie, Yalsa, ⁴³ Yixlfuxrta, Yalsixrnaxr, Nixrxi, ⁴⁴ Ziyila, Yalgexrxi nei Marlixlsa. Maelmaerjgia a mel, zzi ge maex zza, halae zzi dax naer dae kax mel lei ca dae.

⁴⁵ Yoxl Yirgexrluixr nei Yirgexrluixr dax naer dae zzi nei kax mel lei ca dae. ⁴⁶ Yirgexrluixr cirdae a neixvi dax zzezze, Yalsixrtu dax naer dae zzi mel nei zzi maelleil kax maelmaerjgia ca dae.

⁴⁷ Yalsixrtu nei Yalsixrtu dax naer dae zzi mel nei kax mel, Jiasar nei Jiasar dax naer dae zzi mel nei kax mel dax cirdae a, Aezixr ddei lazzarmossor zex dax zzezze, halae neixvi nei neixvi dax naer dae middei mel dax zzezze ci.

⁴⁸ Wordabbor zzi mel mel hherdder: Samixl, Yartixr'aer, Soge, ⁴⁹ Daxlnaxr, Zilixl-Saxlnaxr (Zilixl-Saxlnaxr mel dder Dirbixl nga a), ⁵⁰ Yalnaxrboxr, Yirsixrtixrmoxl, Yalnixl, ⁵¹ Gesa, Hexrluixr nei Ziloxr. Maelmaerjgia a mel zzi ceidil maex zza, halae zzi dax naer dae kax mel lei ca dae.

⁵² Yoxl Yalla, Duxlmar, Yirsa, ⁵³ Yarnoxr, Boxr-Tapuryal, Yalfeijia, ⁵⁴ Hoxrta, Zilixl-Yalba (Zilixl-Yalba mel dder Xiboxrluixr nga a) nei Xir'aer. Maelmaerjgia a mel zzi ge maex zza, halae zzi dax naer dae kax mel lei ca dae.

⁵⁵ Yoxl Maryuexr, Jiamixl, Xifuxr, Yueta, ⁵⁶ Yisilixl, Yuedixl, Sarnoxryal, ⁵⁷ Gieyir, Zibiryal nei Tixrnaxl. Maelmaerjgia a mel zzi cei maex zza, halae zzi dax naer dae kax mel lei ca dae.

⁵⁸ Yoxl Hafu, Boxr-Suxl, Zitu, ⁵⁹ Marlaxl, Boxr-Yalnoxr nei Yilextixrju. Maelmaerjgia a mel zzi qiuxl maex zza, halae zzi dax naer dae kax mel lei ca dae.

⁶⁰ Yoxl Zilixl-Balixl (Zilixl-Balixl mel dder Zilixl-Yilixr nga a) nei Laba. Maelmaerjgia a mel zzi nr maex zza, halae zzi dax naer dae kax mel lei ca dae.

⁶¹ Hierbolpae gga zzi mel mel hherdder: Boxr-Yallaba, Mixldi, Xijiajia, ⁶² Nixlsa, Yixrcexr nei Yir-Zidir. Maelmaerjgia a mel zzi qiuxl maex zza, halae zzi dax naer dae kax mel lei ca dae.

⁶³ Yiluxlsaler zzi gga goxr dae Yibuxlsi su ca mel leil bbeix ci a nael, Yoxrdaxl su ca mel yaa leil ggaxr teixl gger nr xie. Yel eilni zzezze ci a lei, Yibuxlsi su ca mel Yiluxlsaler zzi gga Yoxrdaxl su ca mel dax cirgo a goxr dae.

Yirfaxrlixr Ddei Cuxr Leil Nei Marnaxrsi Ddei Cuxr
Gga Ca Cir Peix Leil Bbe Gger Dae Middei Mel

16 ¹ Yuesaexl ddei giedae ca mel nijiu a bbe wo middei mel mel, Yilixlge dax naer ggie Yuedaxl lazzarmo dax cirdae a, Yilixlge ddei dofa piar a gga lur zer ggie zzezze, Yilixlge cirdae ddeix a, wordabbor hierbolpae mel leil gger a, Boxrtexllixl dax ssi ci. ² Yoxl Boxrtexllixl cirdae a Luxlsi zzezze ssi ci a, Yalzi su ca mel ddei middei yarqir leil lal gel a, Yaltaluxl zzi zzezze ssi ci. ³ Yoxl xifa piar

a gga ze i a Yalixltixr su ca mel ddei middei yarqir leil ze i ci a, yilzi a ze i a Boxr-Hexrluixr ze i ci, zeixleixr Zisexl dax ze i a, neixvi dax zzeze ssi ci.

⁴ Yuesaexl ddei ssor Marnaxrsi nei Yirfaxrlixr ddei giedae ca mel, yaa ddei middei mel bbe wo a.

Yirfaxrlixr Ddei Cuxr

⁵ Yirfaxrlixr ddei giedae ca mel jiacuxr dax zox dae a bbe wo middei mel jiasibbor eilmel nga a: yaa bbe wo middei ddei dofa piar a gga yarqir leil mel, Yaltaluxl-Yaldaxr cirdae a Boxrhexrluixr ddei ggaxrsibbor piar a gga zzeze ddeix ci; ⁶ xifa piar a gga nael, baexrfa piar a gga ddei Mixlmirta dax ssi ci a, yoxl dofa piar a gga Tanaxl-Sixlloxr dax za ci a, yoxl Yarnoxrha ddei dofa piar a dax zol gex; ⁷ Yarnoxrha cirdae a Yaltaluxl nei Naxrla ze i ci, yoxl Yilixlge gger a, Yuedaxl lazzarmo dax zzeze ssi ci. ⁸ Tapuryal cirdae a xifa piar a gga ssi a, Jianaxr lazzarmossor dax ssi ci. Yoxl halmaex cirdae a, neixvi dax zzeze ssi ci. Eilmel mel dder Yirfaxrlixr ddei cux jiacuxr dax zox dae a bbe wo middei mel nga a. ⁹ Kebal nael, Marnaxrsi su ca mel bbe wo middei mel gga zzi ar mel nei zzi dax naer dae kax ar mel a lei Yirfaxrlixr su ca mel leil bbe gger a. ¹⁰ Yaa mel Zisexl goxr dae Jianaxr su ca mel leil ggaxr teixl nr gger; Yel Jianaxr su ca mel eilni zzeze ci a lei Yirfaxrlixr su ca mel dax goxr dax dae a, Yirfaxrlixr su ca mel ddei zebol mu.

Marnaxrsi Ddei Cuxr

17 ¹ Marnaxrsi mel Yuesaexl ddei ssor vaervaer ddei nga a; yar ddei cuxr nijiu a bbe wo middei mel jiasibbor vaexr deix dae: Marnaxrsi ddei ssor vaervaer hherdder Zilixl yarbbor Marzixr mel, zzi deil sexrsexr ca ar ddei a; yel dder Zilixl mermi nei Basa mermi bbe wo a. ² Marnaxrsi ddei kebal giedae ca mel jiacuxr dax zox dae a middei bbe, yaa mel hherdder: Yalbiryirxiexl ddei giedae ca, Xilexl ddei giedae ca, Yalsilixl ddei giedae ca, Sixljixl ddei giedae ca, Xifuxr ddei giedae ca, Sixlmirdaxl ddei giedae ca. Eilmel jiacuxr dax zox dae a mel, maelmaerjia lei Yuesaexl ddei ssor Marnaxrsi

ddei giedae ca mel gga capor mel nga a. ³ Marnaxrsi ddei lilwor, Marzixr ddei leixwor, Zilixl ddei lilbol, Xifuxr ddei ssor Xiloxrfeiha mel ssor nr zza, ssormaer lar zza. Yar ddei ssormaer mel leil mel Marla, Noxr'a, Hexrla, Mixljia, Dexrsar eine mi; ⁴ yaa Arbosobo leil zi su Yirlixlyalsar nei Nexl ddei ssor Yuesuyal, halae vaervaerpor mel meixsaer qir leil ssi ci a, bbeix: "Yihexrhuaxr halleix Moxrxi leil miardal a ngua ddei arzzi-nimar mel gga ngua li wo mibbe mel ngua leil bbe gger lol," eine bbeix a. Yel Yuesuyal Yihexrhuaxr miardal dae mel dax zox dae a, yaa armael ddei arbbor ddei arzzi-nimar mel gga, yaa li wo mibbe middei mel yaa leil bbe gger a. ⁵⁻⁶ Marnaxrsi ddei ilmo mel, Marnaxrsi ddei lilbol mel gga lei middei bbe wo a; yel Yuedaxl lazzarmo dofa piar a gga Zilixl mermi nei Basa mermi leil cuxr teixl a, Marnaxrsi halae kebal middei cei maex bbe dax wo a. Zilixl mermi mel Marnaxrsi ddei kebal lilbol mel ddei a.

⁷ Marnaxrsi bbe wo dae middei mel mel: Yalsexl cirdae a, Sixljixl dofa piar a gga Mixlmirta dax ssi ci; naxrfa piar a gga nael Yir-Tapuryal su ca mel goxr ggie dax ssi ci. ⁸ Tapuryal zzi zaza-lili mel Marnaxrsi ddei a; nael Marnaxrsi ddei mermi yarqir leil Tapuryal zzi ddei mel Yirfaxrlixr ddei giedae ca mel ddei a. ⁹ Yar ddei middei yarqir mel Jianaxr lazzarmossor ddei naxrfa piar a gga zei ci. Marnaxrsi ddei zzi mel gga zzi eilmel Yirfaxrlixr ddei a. Marnaxrsi ddei middei yarqir mel, lazzarmo baexrfa piar a gga cirdae a neixvi ddei dax zzeze ssi ci. ¹⁰ Naxrfa piar a gga mel, Yirfaxrlixr ddei a; baexrfa piar a gga nael, Marnaxrsi ddei a; neixvi bbe mel, yaa ddei xifa piar a gga yarqirbbaer nga a; baexrfa piar a gga nael, Yalsexl dax ssi ci; dofa piar a gga mel, Yirsarjia dax ssi ci. ¹¹ Yirsarjia mermi nei Yalsexl mermi gga, Boxr-Saxl zzi nei halmaex gga ddei kax; Yirboxrlixr zzi nei halmaex gga ddei kax; halae Do'er zzi gga goxr dae ca mel nei halmaex gga ddei kax; yoxl worga so maex gga hherdder Yirdo'er nei halmaex gga ddei kax; Tanaxl zzi gga goxr dae ca mel nei halmaex gga ddei kax; Mirzixrdo zzi gga goxr dae ca mel nei halmaex gga ddei kax eilmel maelmaerjjia Marnaxrsi ddei a. ¹² Nael Jianaxr su ca mel ddoddo-nrddo zzi eilmel gga hher, yel Marnaxrsi ddei giedae ca mel Jianaxr su ca eilmel leil ggaxr teixl

gger nr xie. ¹³ Yirsaexllixl su ca mel sexr du lei car, Jianaxr su ca mel leil miar lirlir bei lol. Nael yaa leil ggaxr teixl jjia nr gger.

Yuesaexl Ddei Giedae Ca Mel Middei Halnol Li

¹⁴ Yuesaexl ddei giedae ca mel Yuesuyal leil bbeix: “Yihexrhuaxr ngua leil seir lol a, ngua ddei cuxr ddei ca yarzi sael miur. Ni arsae-nga a ngua leil cir boxl a njiu lol, middei cir fel lar bbe gger leir?”

¹⁵ Yuesuyal yaa leil bbeix: “Nia ddei cuxr ddei ca yarzi sael miur a, nia zzirdae a Yirfaxrlirx worga leil middei mel zaex arddeirnga a, nia Birlixlxir su ca nei Lixlfaxryi su ca mel ddei middei gga sixzzei cili mel taexl a middei kuax dax lol cexr.”

¹⁶ Yuesaexl ddei giedae ca mel ddarkoxl a bbeix: “Wordabbor middei hal mel ngua hher loxr nr ddo, halae middei bbaelerler ggie goxr dae Jianaxr su ca mel, hherdder Boxr-Saxl zzi nei zzi maelleil kax gga goxr dae ca mel, halae Yisilixl lagiex gga goxr dae ca mel, maelmaerjjia lei he bei teixl lei marcae zza.”

¹⁷ Yuesuyal Yuesaexl hhexr leil, hherdder Yirfaxrlirx su ca nei Marnaxrsi su ca mel leil bbeix: “Ni ddei cuxr ddei mel ca yarzi sael miur, halae yarzi sexr, ni cir boxl njiu meirne middei a li wo mel nr cexr.”

¹⁸ Wordabbor middei mel lei ni leil gger nia, sixzzei cili a nga bbeixarnar a, ni sixzzei mel taexl a middei cirddei-lorbba ni ddei loxr cexr. Middei hal mel arsae bei lei ni leil gger. Jianaxr su ca mel he bei teixl lei marcae zza, halae sexr bbeixarnar a, nael ni yaa leil ggaxr teixl gger xie.”

Kebal Middei Mel Bbe

18 ¹ Yirsaexllixl su ca maelmaerjjia Sixlloxr mermi hher pex du lei a, halmaex gga Sexlmuxl zi. Yaa mel middei hal ddei leil ddaexr leixl gger ho a. ² Nael Yirsaexllixl su ca sir cuxr a mel, halae yaa li wo mibbe middei mel bbe nr wo seir. ³ Yuesuyal Yirsaexllixl su ca mel leil bbeix: “Nia dawo doxr dae a, nia porpor mel ddei Arbosobo Yihexrhuaxr nia leil gger middei mel nr li ssi a, arddolcar ci nia zzirdae neil?”

⁴ Nia circuxr-hanga gga ca soler tiur teixl lei a, ngo yaa leil miardal teixl a, yaa middei halmaex gga ssi jiax nia. Yaa circuxr-hanga bbe wo mibbe middei mel dax zox dae a vaexr

zei lei a, ngo dax jjixr lei nia. ⁵ Yaa middei ddei sir fel bbe mal nia. Yoxrdaxl giedae ca mel, naxrfa piar a gga yaa hher ggie hher dae. Yuesaexl giedae ca mel, baexrfa piar a gga yaa hher ggie hher dae. ⁶ Nia middei eil sir fel vaexr teixl lei ho a, ngo leil vei mal gger lei. Yel ngua Arbosobo Yihexrhuaxr meixsaer qir leil nia leil njiu gger nia. ⁷ Lixlweixl su ca mel Yihexrhuaxr leil zi su bei a mel dder yaa li wo mibbe ddei nga a; yel Lixlweixl su ca mel nia dax middei bbe dax wo nr ddo. Jiadaexr ddei cuxr, Liuxrbixl ddei cuxr nei Marnaxrsi ddei cuxr gga ca cir peix a mel, Yuedaxl lazzarmo dofa piar a gga middei bbe wo ho a; hherdder Yihexrhuaxr leil visser su Moxrxi yaa leil bbe gger dae mel nga a.”

⁸ Middei vaexr ssi su mel ssi niazzir dae car, Yuesuyal yaa leil miardal a bbeix: “Nia middei hal mel leil ssi jiax a, middei mel vaexr zei lei a, ngo dax eilmaex jjixr lei nia. Ngo Sixlloxr mermi eilmaex gga, Yihexrhuaxr meixsaer qir leil hher dae a, nia leil njiu gger nia.”

⁹ Yel yaa dder ssi a, middei halmaex gga ssi jiax a. Yaa zzi mel dax zox dae a sir fel bbe mal a, sul ber leil vaexr deix dae a, Sixlloxr mermi Yuesuyal dax halmaex jjixr lei a. ¹⁰ Yuesuyal dder Sixlloxr mermi, Yihexrhuaxr meixsaer qir leil, yaa leil njiu gger. Yuesuyal halmaex hher dae a, Yirsaexllixl ddei cuxr mel dax zox dae a, middei mel yaa leil bbe gger a.

Bixlyarmir Ddei Cuxr Leil Bbe Gger Dae Middei Mel

¹¹ Bixlyarmir ddei cuxr, jiacuxr dax zox dae a njiu a bbe wo middei mel, Yoxrdaxl nei Yuesaexl ddei giedae ca mel agala gga a.

¹² Yaa ddei baexrfa piar a gga middei yarqir leil mel Yuedaxl lazzarmo dax cirdae a, ggaxrsibbor ddeix a Yilixlge ddei baexrfa piar a dax, yoxl xifa piar a wordabbor middei dax gger a, Boxryalweixr mermi hierbolpae dax zzezze ssi ci. ¹³ Yoxl halmaex gga cirdae a naxrfa piar a gga Luxlsi mermi lal gel. Luxlsi mel dder Boxrtexllixl nga a. Yoxl Yaltaluxl-Yaldaxr dax zei ci a, Boxr-Hexrluixr jiasi piar a gga naer dae naxrfa piar a gga worga mel dax ssi ci. ¹⁴ Halmaex gga cirdae a xifa piar a gga ssi a, yoxl naxrfa piar a gga za mal a, Boxr-Hexrluixr naxrfa piar a gga deixrgoxr worga mel dax

cirdae a, Yoxrdaxl su ca mel ddei zzi Zilixl-Balixl dax zzeze ssi ci (Zilixl-Balixl mel dder Zilixl-Yilixr nga a). Eil ddei mel dder xifa piar a gga yarqirbbaer middei mel nga a. ¹⁵ Naxrfa piar a gga yarqirbbaer middei mel, Zilixl-Yilixr zzi yarqirbbaer cirdae a, xifa piar a gga Nixrfuxrdoyal lur zer ggie zzeze ssi ci. ¹⁶ Yoxl Xinexlzir lagiex deixrgoxr worga mel yarqirbbaer ze ci, hherdder Lixlfaryi lagiex gga baexrfa piar a gga worga mel nga a; Yoxl Xinexl lagiex dax ze ci a, Yibuxlsi su ca mel ddei naxrfa piar a gga cirdae a, Yir-Loxrjiexr dax ze ci. ¹⁷ Yoxl baexrfa piar a gga Yir-Sixlmaex lur ddux ggie ssi ci, Yaldumir mermi dexbbor ddei deixrgoxr Zilixlluxl mermi dax ssi ci; yoxl Liurbixl ddei ssor Bohar ddei legelbbe dax ze ci. ¹⁸ Yoxl Yal-laba deixrgoxr lal gel a, baexrfa piar a gga Yalaba dax ze ci; ¹⁹ Yoxl Boxr-Herla ddei baexrfa piar a gga lal gel a, cor zza neixvi baexrfa piar a gga ajjix pe dil lei ggie zzeze ssi ci, hherdder Yuedaxl lazzarmo ddei naxrfa piar a gga ollele nga a; eil mel hherdder naxrfa piar a gga yarqirbbaer middei mel nga a. ²⁰ Dofa piar a gga Yuedaxl lazzarmo zex dax zzeze bbe kae. Eilmel mel Bixlyarmir su ca mel jiacuxr dax zox dae a bbe wo middei mel nei zaza-lili yarqirbbaer middei mel nga a.

²¹ Bixlyarmir ddei cuxr jiacuxr dax zox dae a bbe wo zzi mel mel hherdder: Yilixlge, Boxr-Herla, Yimaexl-Zixi, ²² Boxr-Yallaba, Xirmarlr, Boxrtexllixl, ²³ Yalweixr, Bala, Exrfuxrla, ²⁴ Zifaxr-Amoxrnixr, Exrfuxrnixr nei Jiaba. Maelmaerjia a mel zzi ceinir maex zza, halae zzi dax naer dae kax mel lei ca dae. ²⁵ Yoxl Zibixl, Lamar, Birluxl, ²⁶ Mirsiba, Zifeila, Moxrsar, ²⁷ Lixlje, Yilixlpirlexl, Talala, ²⁸ Xirla, Yirlixlfuxr, Yibuxlsi (Yibuxlsi mel dder Yiluxlsaler nga a), Zibiryal nei Zilixl. Maelmaerjia a mel zzi ceili maex zza, halae zzi dax naer dae kax mel lei ca dae. Eilmel mel Bixlyarmir su ca mel jiacuxr dax zox dae a bbe wo middei mel nga a.

Simixl Ddei Cuxr Leil Bbe Gger Dae Middei Mel

19 ¹ Nr boxl ddei njiu a mel Simixl ddei cuxr jiacuxr dax zox dae a, bbe wo middei mel bbe. Yaa bbe wo middei mel Yoxrdaxl su ca mel ddei middei mel gga hher ji dae. ² Yaa bbe wo zzi mel mel

hherdder: Bixrsixlba (Bixrsixlba leil Sixlba lei bbeix), Moxrladaxl, ³Hasaxl-Suyal, Bala, Yirse, ⁴Yilixldola, Birturlixl, Hexr'aermar, ⁵Xirgexrla, Boxr-marjiaboxr, Hasaxl-susar, ⁶Boxr-Lixlbawuxl nei Salurxier. Maelmaerjgia a mel, zzi ceiso maex zza, halae zzi dax naer dae kax mel lei ca dae. ⁷Yoxl Yalyi, Lixlmexr, Yirtie nei Yalsa. Maelmaerjgia a mel, zzi li maex zza, halae zzi dax naer dae kax mel lei ca dae. ⁸Hallae zzi eilmel ddei zaza-lili kax maelmaerjgia dax cirdae a, Bala-Bir'aer zzezze ssi ci, hherdder naxrfa piar a gga Lamar mermi nga a. Eilmel hherdder Simixl ddei cuxr jiacuxr dax zox dae a bbe wo middei mel nga a. ⁹Simixl su ca mel ddei middei mel mel Yoxrdaxl su ca mel ddei middei mel gga bbe teixl lei. Yoxrdaxl ddei cuxr bbe wo middei mel yarzisael kuax, yel Simixl su ca mel yaa ddei middei mel gga, middei bbe wo a.

Xibuxlluixr Ddei Cuxr Leil Bbe Gger Dae Middei Mel

¹⁰So boxl ddei nijiu a mel Xibuxlluixr ddei cuxr jiacuxr dax zox dae a bbe wo middei mel bbe. Yaa ddei middei yarqirbbaer mel Sarlixl dax ssi ci; ¹¹Sarlixl cirdae a, xifa piar a gga gger a, Marlala nei Daxlbasaexl gger ci a, yoxl Yuenixl dofa piar a gga lazzarmossor zex dax ssi ci. ¹²Yoxl Sarlixl cirdae a dofa piar a gga merni ddux teixl lei ggie za mal a, Jixrsiluxl-taboxr yarqirbbaer ssi ci a, Saxl-birla gger a, Yarfeiyal zzezze ddeix ci. ¹³Halmaex gga dofa piar a gga ssi a, Jiatexl-xifuxr dax lal gel a, Yirtexl-jia'xuxl dax ssi ci, yoxl Lixrmexr dax gger ci. Lixrmexr cirdae a, Nixryal dax zzezze ssi ci. ¹⁴Yoxl Nixryal ddei baexrfa piar a leil lal gel a, Hanaxrduixl za gel ci a, Yifuxrta-yilexl lagiex dax gger ci. ¹⁵Halae Jiata, Naxrhala, Seluixr, Yirdaxlla nei Boxrlixlhexr ca dae. Maelmaerjgia a mel zzi ceinir maex zza, halae zzi dax naer dae kax mel lei ca dae. ¹⁶Ggaxrsibbor zzi eilmel nei zzi dax naer dae kax eilmel, hherdder Xibuxlluixr ddei cuxr jiacuxr dax zox dae a bbe wo middei mel nga a.

Yirsarjia Ddei Cuxr Leil Bbe Gger Dae Middei Mel

¹⁷Li boxl ddei nijiu a mel Yirsarjia ddei cuxr jiacuxr dax zox dae a bbe wo middei mel bbe. ¹⁸Yaa bbe wo middei mel hherdder: Yi-

silixl, Zisulixl, Sunixl, ¹⁹ Hafuxrlixr, Sixl'axl, Yalnaxrhala, ²⁰ Labixl, Zisaxl, Yalbixr, ²¹ Lixlmiexl, Yir-ganixr, Yir-hadaxl, Boxr-paxlxue, ²² Taboxr, Sahaxirmar nei Boxr-Sixlmaexl dax cirdae a, Yuedaxl lazzarmo dax zzezze ssi ci. Maelmaerjgia a mel zzi ceiqiuxl maex zza, halae zzi dax naer dae kax mel lei ca dae. ²³ Zzi eilmel nei zzi maelleil kax mel mel dder Yirsarjgia ddei cuxr jiacuxr dax zox dae a bbe wo middei mel nga a.

Yalsexl Ddei Cuxr Leil Bbe Gger Dae Middei Mel

²⁴ Ngor boxl ddei nijiu a mel Yalsexl ddei cuxr jiacuxr dax zox dae a bbe wo middei mel bbe. ²⁵ Yaa bbe wo middei mel hherdder: Heijiaxr, Halixl, Birtiexr, Yasaxl, ²⁶ Yallamirlexl, Yalmoxl nei Mirsalexl nga a. Xifa piar a gga Jiamixl nei Xihexr-lixlnaxl dax ssi ci a, ²⁷ mer-ni ddux lei ggie za mal a, Boxr-daxlguir dax nei Xixlbuxlluixr dax ssi ci. Baexrfa piar a gga Yifuxrta-yilexl lagiex dax ssi ci. Yoxl Boxr-yirmoxl nei Nixryal dax ssi ci a, Jiabuxllexl ddei vael piar a gga lei gger ci. ²⁸ Yoxl Yixlboxrluixr, Lixlhexr, Hamae, Jianaxr dax cirdae a, Xiduixl zzi vaervaer ddei dax ssi ci. ²⁹ Lamar nei Taexl'aer zzi yarzi ssei ddei dax za ci. Yoxl Hexrsaxl nei Yalgexrxi dax halpiar a gga za ci a, dixlzo neixvi dax zzezze ssi ci. ³⁰ Halae Wumar, Yalfuxr nei Lixlhexr. Maelmaerjgia a mel, zzi nrzei nr maex zza, halae zzi dax naer dae kax mel lei ca dae. ³¹ Zzi eilmel nei zzi dax naer dae kax mel hherdder Yalsaexl ddei cuxr jiacuxr dax zox dae a bbe wo middei mel nga a.

Naxrfuxrtalixl Ddei Cuxr Leil Bbe Gger Dae Middei Mel

³² Qiuxl boxl ddei nijiu a mel, Naxrfuxrtalixl ddei cuxr jiacuxr dax zox dae a bbe wo middei mel bbe. ³³ Yaa ddei yarqirbbaer middei mel Xilixlfuxr dax cirdae a, Sarnaxryi ddei saexlzzei vaervaer zzei dax halmaex ssi ci. Yoxl Yaldaxlmir-nixrjixr nei Yarbirnixl dax cirdae a, Lagoxl zzezze ssi ci a, yoxl, Yuedaxl lazzarmo dax ssi ci. ³⁴ Yoxl xifa piar a gga za mal a, Yalsinaxl-taboxr dax ssi ci; halmaex cirdae a, Huxlge gger ci; naxrfa piar a gga nael, Xibuxlluixr dax ssi ci; xifa piar a gga nael, Yalsaexl dax ssi ci; yoxl merni ddux

teixl lei ggie, Yuedaxl lazzarmo dax halmaex Yoxrdaxl dax ssi ci.
³⁵ Sseisseimo zzi mel hherdder: Xidi, Cexl'aer, Hamoxl, Lajiaxr, Zinixrlixl, ³⁶ Yaldaxlmar, Lamar, Xiaxlor, ³⁷ Zidirsi, Yirdaexrlaexr, Yir-xiaxlor, ³⁸ Yirlixlweir, Mixldaxl-yilexl, Hexrlixr, Boxr-Yalnaxl nei Boxr-Sixlmaexl. Maelmaerjia a mel, zzi ceige maex zza, halae zzi dax naer dae kax mel lei ca dae. ³⁹ Zzi eilmel nei zzi dax naer dae kax mel hherdder Naxrfuxrtalixl ddei cuxr jiacuxr dax zox dae a bbe wo middei mel nga a.

Daxl Ddei Cuxr Leil Bbe Gger Dae Middei Mel

⁴⁰ Sir boxl ddei nijiu a mel, Daxl ddei cuxr jiacuxr dax zox dae a bbe wo middei mel bbe. ⁴¹ Yaa ddei yarqirbbaer middei mel hherdder: Sorla, Yirsixrtar, Yi'aer-sixlmaexl, ⁴² Salabix, Yalyarluixr, Yitixrla, ⁴³ Yirluixr, Tixrnaxrta, Yirgexrluixr, ⁴⁴ Yilixltixrzi, Zibirduixl, Bala, ⁴⁵ Yifuxrdaexr, Birnixr-Birla, Jiatexl-Lixrmexr, ⁴⁶ Meir-Yikui, Lakui nei Yuepaxl deixrgoxr yarqirbbaer middei mel nga a. ⁴⁷ Daxl ddei cuxr gga ca mel ddei mi mel si su si car, yaa ddeix a, Lixlsaxl zzi ddei leil ddaexr a, zzi gga ca mel leil seixl zil gger a, zzi ddei su si lei a. Yoxl yaa ddei porpor Daxl ddei mi sser a, Lixlsaxl zzi ddei leil Daxl mi gger. ⁴⁸ Zzi eilmel nei zzi dax naer dae kax mel hherdder Daxl ddei cuxr jiacuxr dax zox dae a bbe wo middei mel nga a.

Maelele Bbe Middei Mel

⁴⁹ Yirsaexllixl su circuxr-hanga middei mel bbe jjia ho a, yoxl yaa ddei middei mel gga ar mel a Nexl ddei ssor Yuesuyal leil bbe gger a. ⁵⁰ Yirsaexllixl su ca mel Yihexrhuaxr miardal dae mel dax zox dae a, Yuesuyal li niazzir dae Yirfaxrlixr worga leil Tixrnaxr-xila zzi ddei yar leil bbe gger a. Yar dder zzi hal ddei ggu xixl a, halmaex gga goxr dae a.

⁵¹ Eilmel mel dder Arbosobo leil zi su Yirlixlyalsar nei Nexl ddei ssor Yuesuyal, halae Yirsaexllixl su circuxr-hanga leil guaxr su ca mel, Sixlloxr mermi Sexlmuxl gielmi alddur dax, Yihexrhuaxr meix-saer qir leil, nijiu a bbe dae middei mel nga a. Eine zzezze, yaa middei mel bbe jjia a.

Pahher Ggie Zzi Zi

20¹ Yihexrhuaxr Yuesuyal leil bbeix: ² “Ni Yirsaexllixl su ca mel leil miardal a bbeix: ‘Nia ngo Moxrxi leil sser dae a nia leil miardal dae mel dax zox dae a, zzi ar mel bbe teixl lei a pa teixl lei su ca mel pahher ggie zzi bei nia. ³ Yel fa nr saexl a ca leil seixl zil gger su ca mel leil halmaex pa mal cexr lol. Zzi eilmel nia nia leil seixl koxl xixl su ca mel leil pahher ggie bei cexr. ⁴ Ca seixl su ca hal ddei zzi eilmel gga ar ddei gga pa mal nia, zzi gielmi alddur dax ngier dae a, arsae lerler nga hal mel ca leil guaxr su camar mel leil bbeix gger nia. Yaa dder yar leil zzi ddei gga ddir lol a, yar leil hher ggie gger a, yar leil yaa dax hher dax dae lol. ⁵ Ca leil seixl zil gger su ca hal ddei mel, yar seixl zil gger ca hal ddei leil vuxr-nr-yixr, dexryixl seixl zil gger nr nga. Yel seixl koxl xixl su ca mel ggaxrmae lei arddeirnga a, ca leil guaxr su camar mel yar leil jia teixl lei nr ddo. ⁶ Yar zzi hal ddei gga hher dae a, ca mel meixsaer qir leil yar leil ser hane zzezze hher ci, halae yar ca seixl halcar Arbosobo leil zi su vaer zzir bei su hal ddei si ho a saelnei yar pa teixl lei zzi ddei gga jjixr ddo.’”

⁷ Yel, Yirsaexllixl su ca mel Naxrfuxrtalixl worga leil, Jialixllixl mermi Zidirsi zzi ddei leil bbe teixl lei a; Yirfaxrlixr worga leil Sixljixl zzi ddei leil bbe teixl lei a; Yoxrdaxl worga leil Zilixlyalba zzi ddei leil bbe teixl lei a. (Zilixlyalba mel dder Xiboxrluixr nga a.) ⁸ Yoxl Yuedaxl lazzarmo maelleil, Yilixlge ddei dofa piar a gga, Liurbixl ddei cuxr gga, hierbolpae bbaelerler mel gga Birxi zzi ddei leil bbe teixl lei. Jiadexr ddei cuxr gga Zilixl mermi Lamoxl zzi ddei leil bbe teixl lei; Marnaxrsi ddei cuxr gga Basa mermi Gelaxr zzi ddei leil bbe teixl lei. ⁹ Eilmel maelmaerjjia lei Yirsaexllixl su ca hazza leil nei Yirsaexllixl su ca mel dax ngol hher dae ca hazza leil bbe teixl gger lei zzi mel nga a. Fa nr saexl a ca seixl zil gger su maelmaerjjia leil halmaex pa mal cexr lol. Eine nga a mel, yar leil ca mel meixsaer qir leil nr ser hozze mel, yar dder seixl koxl xixl lei su ca mel leixrga gga si nr var.

Lixlweixl Su Ca Mel Ddei Zzi

21 ¹ Halcar, Lixlweixl su ddei jiacuxr mel ddei vaervaerpor mel, Arbosobo leil zi su Yirlixlyalsar nei Nexl ddei ssor Yuesuyal, halae Yirsaexllixl su circuxr-hanga leil guaxr su mel meixsaer qir leil lei ci a, ² Jianaxr mermi Sixlloxr zzi gga yaa leil bbeix: “Halleix Yihexrhuaxr Moxrxi leil sser dae a miardal a ngua leil hher ggie zzi ar mel bbe gger lol, halae zzi maelleil ngua ddei zzeir mel leil loxl ggie middei ar mel bbe gger lol.” ³ Yel Yirsaexllixl su ca mel Yihexrhuaxr miardal dae mel dax zox dae a, armael ddei middei mel gga, jiasibbor vaexr dae zzi mel nei zzi maelleil middei mel Lixlweixl su ca mel leil gger a:

⁴ Lixlweixl ddei giedae ca Gexiaxr ddei jiacuxr gga, Arbosobo leil zi su Yalluixr ddei giedae ca mel, Yoxrdaxl ddei cuxr gga, Simixl ddei cuxr gga nei Bixlyarmir ddei cuxr gga middei mel gga nijiu a zzi ceiso maex nijiu wo a. ⁵ Gexiaxr ddei jiacuxr gga Yalluixr ddei kebal giedae ca mel nael, Yirfaxrlixr ddei cuxr gga, Daxl ddei cuxr gga nei Marnaxrsi ddei cuxr gga ca cir peix ddei middei mel gga nijiu a, zzi cei maex nijiu wo a.

⁶ Gesuixl ddei giedae ca mel nael, Yirsarjia ddei cuxr gga, Yalsaexl ddei cuxr gga, Naxrfuxrtalixl ddei cuxr gga nei Basa mermi hher dae Marnaxrsi ddei cuxr gga ca cir peix ddei middei mel gga nijiu a, zzi ceiso maex nijiu wo a.

⁷ Mirlalixl ddei giedae ca mel nael, jiacuxr dax zox dae a, Liurbixl ddei cuxr gga, Jiadaexr ddei cuxr gga nei Xibuxlluixr ddei cuxr gga middei mel gga nijiu a, zzi ceinir maex nijiu wo a.

⁸ Yirsaexllixl su ca mel Yihexrhuaxr Moxrxi leil sser dae a miardal dae mel dax zox dae a, zzi eilmel nei zzi maelleil middei mel, nijiu a Lixlweixl su ca mel leil bbe gger a.

⁹⁻¹⁰ Lixlweixl ddei cuxr gga, Gexiaxr ddei Jiacuxr gga Yalluixr ddei giedae ca mel nijiu beil boxl bbe wo a. Jiasibbor eilmel mel Yoxrdaxl ddei cuxr gga nei Simixl ddei cuxr gga middei mel gga nijiu teixl lei a yaa leil bbe gger dae middei mel nga a: ¹¹ Yoxrdaxl worga leil Zilixl-yalba nei zaza-lili middei mel yaa leil gger a. Yalba mel dder

Yalnaxl cuxr ddei porpor a. (Zilixl-yalba mel dder Xiboxrluixr nga a.) ¹² Zzi mel dax naer dae mi mel nei kax mel larnai Yifuxrnixr ddei ssor Jialexl leil gger.

¹³ Yirsaexllixl su ca mel Xiboxrluixr zzi, hherdder fa nr saexl a ca leil seixl zil gger su ca mel pa mal ggie zzi nei zzi maelleil middei mel, Arbosobo leil zi su Yalluixr ddei giedae ca mel leil bbe gger. Halae Lixlnaxr zzi nei zzi maelleil middei mel, ¹⁴ Yartixr'aer zzi nei zzi maelleil middei mel, Yirsixrtixrmoxl zzi nei zzi maelleil middei mel, ¹⁵ Hexrluixr zzi nei zzi maelleil middei mel, Dirbixl zzi nei zzi maelleil middei mel, ¹⁶ Yalyi zzi nei zzi maelleil middei mel, Yue-ta zzi nei zzi maelleil middei mel, Boxr-Sixlmaexl zzi nei zzi maelleil middei mel, maelmaerjjia a yaa leil zzi ge maex gger a. Eimel maelmaerjjia lei Yoxrdaxl ddei cuxr gga nei Simixl ddei cuxr gga bbe teixl lei. ¹⁷ Yoxl Bixlyarmir ddei cuxr gga middei mel gga: Zibixl zzi nei zzi maelleil middei mel, Jiaba zzi nei zzi maelleil middei mel, ¹⁸ Yalnaxrtu zzi nei zzi maelleil middei mel, Yallexlmae zzi nei zzi maelleil middei mel yaa leil gger a. Maelmaerjjia a zzi li maex zza. ¹⁹ Yalluixr ddei giedae ca Arbosobo leil zi su mel maelmaerjjia a zzi ceiso maex zza, halae zzi maelleil middei mel lei ca dae.

²⁰ Lixlweixl ddei cuxr gga, hherdder Gexiaxr ddei kebal giedae ca mel nijiu a, Yirfaxrlixr ddei cuxr gga bbe wo middei mel hherdder: ²¹ Yirfaxrlixr worga leil Sixljixl zzi, hherdder fa nr saexl a ca leil seixl zil gger su ca mel ddei pa mal ggie zzi nei zzi maelleil middei mel, yoxl Zisexl zzi nei zzi maelleil middei mel, ²² Ziboxrxie zzi nei zzi maelleil middei mel, Boxr-hexrluixr zzi nei zzi maelleil middei mel, maelmaerjjia a zzi li maex zza. ²³ Daxl ddei cuxr gga middei mel gga yaa leil bbe gger dae zzi mel hherdder: Yilixltixrzi zzi nei zzi maelleil middei mel, Zibirduixl zzi nei zzi maelleil middei mel, ²⁴ Yalyarluixr zzi nei zzi maelleil middei mel, Jiatexl-lixrmexr zzi nei zzi maelleil middei mel, maelmaerjjia a zzi li maex zza. ²⁵ Mar-naxrsi ddei cuxr gga, ca cir peix ddei middei mel gga yaa leil gger dae zzi mel hherdder: Tanaxl zzi nei zzi maelleil middei mel, Jiatexl-lixrmexr zzi nei zzi maelleil middei mel, maelmaerjjia a zzi nr maex

zza. ²⁶ Gexiaxr ddei kebal giedae ca mel maelmaerjjia a zzi cei maex bbe wo a; halae zzi maelleil middei mel jiujiu ca dae.

²⁷ Marnaxrsi ddei cuxr gga ca cir peix ddei middei mel gga, Basa mermi Gelaxr zzi, hherdder fa nr saexl a ca leil seixl zil gger su ca mel pa mal ggie zzi nei zzi maelleil middei mel, Lixlweixl ddei cuxr gga Gesuixl ddei giedae ca mel leil gger; yoxl Bir-Sitixrla zzi nei zzi maelleil middei mel yaa leil gger. Maelmaerjjia a zzi nr maex zza. ²⁸ Yoxl Yirsarjia ddei cuxr gga middei mel gga, Zisaxl zzi nei zzi maelleil middei mel, Daxlbirla zzi nei zzi maelleil middei mel, ²⁹ Yimoxl zzi nei zzi maelleil middei mel, Yirganixr zzi nei zzi maelleil middei mel yaa leil gger. Maelmaerjjia a zzi li maex zza. ³⁰ Yoxl Yalsaexl ddei cuxr gga middei mel gga, Mirsalexl zzi nei zzi maelleil middei mel, Yaduixl zzi nei zzi maelleil middei mel, ³¹ Hejiaxr zzi nei zzi maelleil middei mel, Lixlhexr zzi nei zzi maelleil middei mel yaa leil gger. Maelmaerjjia a zzi li maex zza. ³² Yoxl Naxrfuxrtalixl ddei cux gga middei mel gga Jialixllixl mermi Zidixrsi zzi, hherdder fa nr saexl a ca leil seixl zil gger su ca mel pa mal ggie zzi nei zzi maelleil middei mel, yaa leil gger; yoxl Hamoxl-do'aer zzi nei zzi maelleil middei mel, Jia'aertar zzi nei zzi mael leil middei mel yaa leil gger. Maelmaerjjia a zzi so maex zza. ³³ Gexrsuixl su ca mel jiacuxr dax zox dae a bbe wo zzi mel, maelmaerjjia a mel ceiso maex zza, halae zzi maelleil middei mel lei ca dae.

³⁴ Kebal Lixlweixl ddei cuxr gga Mirlalixl ddei giedae ca mel, Xibuxlluixr ddei cuxr gga middei mel gga bbe wo zzi mel hherdder: Yuenixl zzi nei zzi maelleil middei mel, Jia'aerta zzi nei zzi maelleil middei mel, ³⁵ Dinaxr zzi nei zzi maelleil middei mel, Naxrhala zzi nei zzi maelleil middei mel, maelmaerjjia a mel zzi li maex zza. ³⁶ Yoxl Liurbixl ddei cuxr gga middei mel gga, Birxi zzi nei zzi maelleil middei mel, Yarzaxr zzi nei zzi maelleil middei mel, ³⁷ Zidirmoxl zzi nei zzi maelleil middei mel, Mirfaxrya zzi nei zzi maelleil middei mel yaa leil gger. Maelmaerjjia a mel, zzi li maex zza. ³⁸ Yoxl Jiadaexr ddei cuxr gga middei mel gga, Zilixl mermi Lamoxl zzi, hherdder fa nr saexl a ca leil seixl zil gger su ca mel pa mal ggie zzi nei zzi maelleil middei mel yaa leil gger; yoxl Marhanixl zzi nei

zzi maelleil middei mel, ³⁹ Xisixrber zzi nei zzi maelleil middei mel, Yarxixl zzi nei zzi maelleil middei mel yaa leil gger. Maelmaerjjia a mel, zzi li maex zza. ⁴⁰ Kibal Lixlweixl ddei cuxr gga ca, hherdder Mirlalixl ddei giedae ca mel jiacuxr dax zox dae a, nijiu a bbe wo zzi mel, maelmaerjjia a ceinir maex zza.

⁴¹ Lixlweixl su ca mel Yirsaexllixl su ca mel ddei middei mel gga bbe wo zzi mel, maelmaerjjia a licei heixl maex zza, halae zzi maelleil middei mel lei ca dae. ⁴² Zzi eilmel zaza-lili lei middei zza, zzi arddol maex lei eine nga.

Yirsaexllixl Su Ca Mel Middei Bbe Wo

⁴³ Eine bei a, Yihexrhuaxr haleix Yirsaexllixl su ca mel ddei porpor mel dax Yirsaexllixl su ca mel leil gger nia bbeix har zaxr dae middei maelmaerjjia, Yirsaexllixl su ca mel bbe wo a, yaa hal mel gga hher dae a. ⁴⁴ Yihexrhuaxr yaa ddei porpor mel dax bbeix har zaxr dae ddar maelmaerjjia dax zox dae a, yaa ddei zaza-lili zaxl-nr-ddaexr lol. Yihexrhuaxr mel yaa leil dir su ca mel leil yaa leixrga gga jia ji gger a; yel yaa leil dir su ca mel yaa leil dir bel su lei ar ddei nr zza. ⁴⁵ Yihexrhuaxr Yirsaexllixl su ca mel leil seir lol bbeix har zaxr dae ddar mel, cir qir lei bbeix hol-nr-pixl, maelmaerjjia lei bbeix dae mel sael a nga.

Yuesuyal Ca Nr Cuxr Peix Leil Jjixr Lol

22 ¹ Halcar, Yuesuyal Liurbixl ddei cuxr leil, Jiadaexr ddei cuxr leil nei Marnaxrsi ddei cuxr gga ca cir peix leil ae si lei a, ² yaa leil bbeix: “Yihexrhuaxr leil visser su Moxrxi nia leil miardal dae mel, nia maelmaerjjia bei mae dae a; ngo nia leil miardal dae mel lei maelmaerjjia noni a. ³ Eilni zzezze ci alei, nia zeixleixr lei nia ddei arzzi-nimar mel leil piar pixl gger nr goxr; halae nia ddei Arbosobo Yihexrhuaxr nia leil bei mae nia miardal dae mel dax bei mae dae. ⁴ Eilcar a, nia ddei Arbosobo Yihexrhuaxr yar bbeix har dae mel dax zox dae a, nia ddei arzzi-nimar mel leil zzasoso a goxr dae lol a. Yel nia Yuedaxl lazzarmo dofa piar a gga, Yihexrhuaxr leil visser su Moxrxi nia leil bbe gger ggie nia ddei zaxlpoxr gga

jjixr ddo a. ⁵ Nael nia seilseir a Yihexrhuaxr leil visser su Moxrxi nia leil miardal dae mel dax nei lixfaxr mel dax bei mae dae nia; nia ddei Arbosobo Yihexrhuaxr leil perniar nia; yar ddei ddar hazza dax bei mae dae nia; yar miardal dae mel dax bei mae dae nia; yar leil lar koxl, nixmox cirtaex-lorbba, xiu cirddei-lorbba yar leil visser nia.”

⁶ Yel Yuesuyal yaa leil seir lol bbeix gger a, yaa leil jjixr lol a, yaa dder yaa ddei zaxlpoxr gga jjixr a.

⁷ Marnaxrsi ddei cuxr gga ca hal peix leil mel, Moxrxi neixrneixrsisi dder Basa mermi yaa leil middei bbe gger a. Eil peix leil nael, Yuesuyal Yuedaxl lazzarmo ddei xifa piar a gga, yaa ddei arzzinimar mel gga, yaa leil middei bbe gger. Yuesuyal yaa leil zaxlpoxr mel gga jjixr lol car yaa leil seir lol bbeix gger, ⁸ yar yaa leil bbeix: “Nia zzeir cirke ggaxr dae, zzaegu, zzirbae, piu, sae, zzir, he nei pia cirke vei dae a, nia ddei zaxlpoxr mel gga jjixr nia, nia ni leil dir su ca mel dax su si lei zzaegu mel, nia ddei arzzi-nimar mel leil bbe gger nia.”

⁹ Yel Liurbixl su ca, Jiadaexr su ca nei Marnaxrsi ddei cuxr gga ca cir peix a mel, Jianaxr mermi Sixlloxr zzi gga ddux a, Yirsaexllixl su ca mel dax nr hher, yaa bbe wo Zillixl mermi gga jjixr a; hherdder Yihexrhuaxr Moxrxi leil sser dae a miardal a, yaa leil bbe gger middei mel nga a.

Yuedaxl Lazzarmo Qir Leil Ziggie Ddei

¹⁰ Liurbixl su ca, Jiadaexr su ca nei Marnaxrsi ddei cuxr gga ca cir peix, Yuedaxl lazzarmo dax naer dae Jianaxr mermi ssi ci a dder Yuedaxl lazzarmo halmaex Arbosobo leil zzeir seixlziggie ar ddei bei. Arbosobo leil zzeir seixlziggie ddei i dae a mu zzae mu vaer zzae vaer. ¹¹ Yirsaexllixl su ca mel bbejjiur a bbeix, Liurbixl su ca, Jiadaexr su ca nei Marnaxrsi ddei cuxr gga ca cir peix a mel Yuedaxl lazzarmo dax naer ggie, Jianaxr mermi yarqir leil Yirsaexllixl su ddei hal piar a gga Arbosobo leil zzeir seixlziggie ar ddei bei a.

¹² Yirsaexllixl su ca mel eilmel leil bbejjiur a dder, maelmaerjgia cir-

go a Sixlloxr zzi gga hher pex du lei a, ddeix a yaa leil ddaexr ssi niazzir dae a.

¹³ Yirsaexllixl su ca mel Arbosobo leil zi su Yirlixlyalsar ddei ssor Feinixrha leil miardal a Zilixl mermi ssi lol a, Liurbixl su ca, Jiadaexr su ca nei Marnaxrsi ddei cuxr gga ca cir peix leil i ssi lol; ¹⁴ yoxl vaervaerpor ceimo leil miardal a Feinixrha dax cirter a ssi lol, hherdder Yirsaexllixl circuxr-hanga ddei vaervaerpor ar ddei a; maelmaerjjia lei jiacuxr mel ddei vaervaerpor a. ¹⁵ Yaa Zilixl mermi ssi ci a, Liurbixl su ca, Jiadaexr su ca nei Marnaxrsi ddei cuxr gga ca cir peix leil mia a, yaa leil bbeix: ¹⁶ “Yihexrhuaxr ddei cassor-worssor maelmaerjjia bbeix: ‘Nia eilni za pixl si a Yihexrhuaxr dax nr mae, Yirsaexllixl su Arbosobo leil de a, armael leil weix a zzeir seixlziggie ar ddei zi a, Yihexrhuaxr leil nr li, nia bei dae eil ddei mel arddolyox zuixl a lei? ¹⁷ Halleix Pir'aer leil zi zuixl ddei halae vaer nr loxr a ngo? Nogielno mel Yihexrhuaxr ddei cassor-worssor mel leil ddeix a bbeixarnar, eilni zzezze ci a lei, niul halae Pir'aer leil zi zuixl ddei cir pixl nr jjia seir. ¹⁸ Nia eilni za pixl si a Yihexrhuaxr dax bei nr mae a ngo? Nia eilni Yihexrhuaxr leil dir a, arggeni yar arsae bei lei Yirsaexllixl su ca maelmaerjjia leil seifu faex var. ¹⁹ Nia bbe wo middei mel, nia zzirdae a sei-nr-beix arddeirnga a mel dder Yihexrhuaxr ddei middei mel dax gger ddo, hherdder Yihexrhuaxr ddei Sexlmuxl zi ggie ngua dax middei bbe ddo. Nael Yihexrhuaxr leil dir nr ddo, halae ngua leil de dae lol nr ddo, Yihexrhuaxr niul ddei Arbosobo leil zzeir seixlziggie ddei leil cuxrteixl a armael leil weix a zzeir seixlziggie bei gger nr ddo. ²⁰ Nia Xixlla ddei leixwor Yalga bei dae ddei leil holcir dae nia. Yar miardal dae mel leil nonr-ni, bei xiaxr gger labox zzaegu mel leil bei xiaxr nr gger. Yar eine bei a, Yirsaexllixl su ca maelmaerjjia leil faxr a. Yalga zuixl bei a, cirmuzil lar si nr nga a.”

²¹ Yel Liurbixl su ca, Jiadaexr su ca nei Marnaxrsi ddei cuxr gga ca cir peix Yirsaexllixl su circuxr-hanga ddei vaervaerpor mel leil ddarkoxl a bbeix: ²² “Yarzi ddo Arbosobo Yihexrhuaxr! Yarzi ddo Arbosobo Yihexrhuaxr, yar mel saexl! Yirsaexllixl su ca mel lei saexl nia! Ngua Yihexrhuaxr leil dir bbeixsael zuixl bei a yar leil de

dae arddeirnga a, eilni dder nia ngua leil bei zil gger ddo! ²³ Ngua armael leil zzeir seixlziggie bei gger a, za pixl si a Yihexrhuaxr dax bei nr mae, bbeixsael adoxl gga cu a zi labox mel, zi labox loxlmoxr mel nei zzaso lol qiuxr a zi labox mel zi ggie ddei leil zi arddeirnga a, Yihexrhuaxr armael leil ngua leil faxr lol ddo. ²⁴ Ngua eine bei a mel, arddolcar a, nia ddei giedae ca mel, ngua ddei giedae ca mel leil bbeix: ‘Nia Yirsaexllixl su ddei Arbosobo Yihexrhuaxr dax azo guaxrzoxr bbeixleir? ²⁵ Yihexrhuaxr mel Yuedaxl lazzarmo zex leil, ngua nei nia Liurbixl su ca, Jiadaexr su ca mel dax giex gex dae lol, yel nia Yihexrhuaxr dax guaxr-nr-zoxr a,’ bbeix leilei a gexr a nga arddeir a. Eine nga a mel, nia ddei giedae ca mel dder ngua ddei giedae ca mel leil, zeixleixr Yihexrhuaxr leil i nr du lol, yar leil nr gexr lol a.

²⁶ Yel ngua dder bbeix: ‘Niul armael leil weix a zzeir seixlziggie ar ddei bei lei, eil ddei leil mel adoxl gga cu a zi labox mel zi bbeixsael kebal zi labox mel zi nr nga a nei, ²⁷ nia nei ngua agala gga, haelae niul giedae ca mel agala gga hoxltexr bei arddeir a. Yel yaa leil ngua lei adoxl gga cu a ziddu mel, zzaso lol qiuxr a ziddu mel nei kebal ziddu mel Yihexrhuaxr leil zi saexl lol. Nrnga a, eilni-arggeni nia giedae ca mel ngua giedae ca mel leil: Nia Yihexrhuaxr dax azo lei guaxr-nr-zoxr, eine bbeix leilei.’ ²⁸ Yel ngua bbeix: ‘Eilni arggeni nia ngua leil bbeixsael ngua ddei giedae ca mel leil eine bbeix a, ngua dder nia leil: “Nia ngua ddei porpor mel bei zzeir seixlziggie ddei leil i ddo, Yihexrhuaxr leil zzeir seixlziggie ddei leil. Eil ddei leil mel adoxl gga cu a zi labox mel zi bbeixsael kebal zi labox mel zi nr nga a nei, nia nei ngua agala gga hoxltexr bei arddeir a,” eine ddarkoxl cexr a.’ ²⁹ Ngua arsae bei lei Yihexrhuaxr dax bei nr mae, bbeixsael zzeir seixlziggie ar ddei bei a adoxl gga cu a zi labox, loxlmoxr zi labox nei kebal zi labox mel zi a, Yihexrhuaxr leil dir eine bei nr var. Ngua ddei Arbosobo Yihexrhuaxr ddei Sexlmuxl xilmeir leil yar leil zzeir seixlziggie ddei leil cuxrteixl a, ngua kebal zzeir seixlziggie nr bei,” eine bbeix a.

³⁰ Arbosobo leil zi su Feinixrha nei yar dax cirgo a hher dax dae vaervaerpor mel, hherdder Yirsaexllixl su circuxr-hanga ddei vaer-

vaerpor mel, Liurbixl su ca, Jiadaexr su ca nei Marnaxrsi su ca mel bbeix dae ddar mel leil bbejjiur a dder yarzi nixlodda. ³¹ Arbosobo leil zi su Yirlixlyalsar ddei ssor Feinixrha Liurbixl su ca, Jiadaexr su ca nei Marnaxrsi su ca mel leil bbeix: “Nia mel Yihexrhuaxr dax zuixl eil ddei nr bei, yel eilni ngua Yihexrhuaxr ngua dax hher dax dae saexl a. Eilcar nia Yirsaexllixl su ca mel leil Yihexrhuaxr ddei leixrhher gga jiuxl teixl lei ho a,” eine bbeix a.

³² Yel Arbosobo leil zi su Yirlixlyalsar ddei ssor Feinixrha nei vaer-vaerpor mel Zilixl mermi Liurbixl su ca nei Jiadaexr su ca mel dax nr hher, Jianaxr mermi jjixr a, eilmel Yirsaexllixl su ca mel leil bbeix gger jjixr. ³³ Yirsaexllixl su ca mel noni ho a, yarzi nixlodda, yel dder Arbosobo leil bbeix zae gger. Yaa zeixleixr Liurbixl su ca nei Jiadaexr su ca mel leil ddaexr ssi a, yaa hher ggie middei mel leil bei xiaxr gger nia nr bbeix a.

³⁴ Liurbixl su ca nei Jiadaexr su ca mel Arbosobo leil zzeir seixl-ziggie ddei leil “hoxltexr” mi gger. Yilsi mel dder bbeix: “Arbosobo leil zzeir seixlziggie eil ddei niul agala gga zza dae a, niul leil Yihexrhuaxr mel Arbosobo a saexl lol hoxltexr ddei nga a.”

Yuesuyal Si Xilmeir Leil Bbeix Zil Dae Ddar Mel

23 ¹ Eine goxr ho a, Yihexrhuaxr Yirsaexllixl su ca mel leil zzaso-so a nga lol, zaza-lili yaa leil dir su ca mel dax zaxl-nr-ddaexr hormo nixixl nga ho a. Yuesuyal mel mar a. ² Yar dder Yirsaexllixl su ca maelmaerjjia leil, yaa leil guaxr su camar mel leil, vaervaerpor mel leil, ca ser su mel leil nei cassor-worssor mel leil guaxr su mel leil ae si lei a, yaa leil bbeix: “Ngo mel mar ho a. ³ Nia leil zaxlddaexr gger su ddei mel hherdder nia ddei Arbosobo Yihexrhuaxr a. Yel nia ddei Arbosobo Yihexrhuaxr nia leil weix a goxrjia hal mel leil bei dae hazza, nia malma mia a. ⁴ Ngo ddaexr wo ho nei ddaexr nr wo seir goxrjia mel ddei middei maelmaerjjia, dofa piar a gga ddei Yuedaxl lazzarmo dax cirdae a, xifa piar a gga ddei Dixlzo neixvi dax zzezze lei nijiu a, nia circuxr-hanga leil bbe gger ho a. ⁵ Nia ddei Arbosobo Yihexrhuaxr arsae bei lei yaa leil nia meixsaer qir leil ggaxr teixl gger a, yaa leil nia dax nr hher ssi du si lol

nia, nia dder arsae bei lei yaa ddei middei mel li wo a; hherdder nia ddei Arbosobo Yihexrhuaxr bbeix har zaxr goxr mel sael a nga a. ⁶Yel nia nixmox vaervaermo zabbar-seilseir a Moxrxi Lixlfaxr sul leil vaexr dae hazza dax bei mae dae nia. Vael piar a gga bbeixsael yo piar a gga ssi pixl nr ddo. ⁷Nia, nia dax hher dae kebal goxrjia ddei gol dae seir ca mel dax hherxiux nr ddo; yaa zi dae te ddei mi ddei, nia ti nr ddo, yar leil dor dae a bbeix har zaxr nr ddo, haelae yar leil visser nr ddo, olddetexl nr ddo. ⁸Nia eilni zzezze bei dae mel dax zox dae a, nia ddei Arbosobo Yihexrhuaxr leil lar koxl ddo. ⁹Yihexrhuaxr mel vaer zzae vaer sexr zzae sexr goxrjia mel leil nia meixsaer qir leil ggaxr teixl gger ho a; eilni zzezze ci a lei, nia meixsaer qir leil ngier ver xie su ca ar ddei nr zza. ¹⁰Nia ddei Arbosobo Yihexrhuaxr mel yar bbeix har goxr mel dax zox dae a, nia leil weix a zaxlddaexr, yel nia ca cir ddei arsae bei lei ca cirdu leil ddaexr leixl gger xie. ¹¹Nia seilseir a fadae a, nia ddei Arbosobo Yihexrhuaxr leil perniar nia. ¹²Nia za pixl si a, Yihexrhuaxr leil dir a, nia dax hher dae kebal goxrjia mel gga gol dae seir ca mel dax cirgo a hher, zzicarzzi ddei capor maerssor bei, zzi dax ssissi-leilei arddeirnga a, ¹³nia yarzi saexl nia, nia ddei Arbosobo Yihexrhuaxr arsae bei lei yaa leil zeixleixr nia meixsaer qir leil ggaxr teixl gger nr var a; yaa nia leil bel dae ddei nei xiagl dae ddei sael a nga; nia nolgger leil deil gex dae lorddu sae a nga, nia meixddur gga ngox ji dae alcur sael a nga, hherdder nia, nia ddei Arbosobo Yihexrhuaxr nia leil gger dae yarzi hher seir ddo middei eilmaex gga cir ddei lei hher su nr zza hane zzezze ci.

¹⁴Ngo ca mu cir se ssi dae jjiimo zex ssi jjia niazzir dae a. Nia maelmaerjjia nixmox zzar lei yarzi saexl, nia ddei Arbosobo Yihexrhuaxr nia leil seirseir meixl gger bbeix goxr ddar mel bei nr ci lei ar qir nr zza, maelmaerjjia lei nia leil bei gger a. ¹⁵Hherdder nia ddei Arbosobo Yihexrhuaxr bbeix har zaxr goxr, cirza-hanga seirseir mel nia leil gger mel sael a nga. Nia yar ddei ddar nr no arddeirnga a, yar arsae bei lei eilmel sael a cirza-hanga nr seir mel nia leil ddeix lol, hherdder nia leil nia ddei Arbosobo Yihexrhuaxr nia leil gger dae yarzi hher seir ddo middei ddei gga mier jjia lol

zzezze ci. ¹⁶ Nia, nia ddei Arbosobo Yihexrhuaxr nia leil miardal a bei mae dae lol bbeix har zaxr dae ddei dax bei nr mae, kebal su ca mel zi dae hal mel leil zi ssi, yaa leil olddetexl arddeirnga a, Yihexrhuaxr arsae bei lei nia dax seifu daxlgaxl faex a, nia leil yar nia leil gger dae yarzi hher seir ddo middei ddei gga, nialngasael mier jjia lol.”

Yuesuyal Sixljixl Mermi Hher Dae A,
Cassor-Worssor Mel Dax Ddar Biar

24 ¹ Yuesuyal Yirsaexllixl su circuxr-hanga leil Sixljixl mermi hher pex du lei lol, yoxl Yirsaexllixl su ddei ca mel leil guaxr su camar, vaervaerpor, ca leil ser su nei cassor-worssor mel leil guaxr su mel leil ae si lei a, yaa dder Arbosobo meixsaer qir leil ngier dae a. ² Yuesuyal cassor-worssor maelmaerjjia leil bbeix: “Yirsaexllixl su ddei Arbosobo Yihexrhuaxr bbeix: ‘Halleix nia ddei porpor, hherdder Yalboxrlahar nei Naxrhexl yarbbor Tala, lazzarmo halpiar a gga goxr dae a kebal su mel zi dae mel leil visser. ³ Ngo nia ddei porpor Yalboxrlahar leil lazzarmo halpiar a gga hier si lei a, yar leil hier dae a Jianaxr mermi maelmaerjjia gga ssi jiax, yoxl yar ddei giedae ca mel leil miur dax lol, Yirsar leil yar leil gger. ⁴ Yoxl Yargel nei Yirsexr leil Yirsar leil gger. Xi'aer worga ga Yirsexr leil gger a yar ddei bei lol; giedae Yargel nei yar ddei giedae ca mel Aezixr goxrjia gga ze ci a. ⁵ Giedae ngo Moxrxi nei Yalluixr leil miardal teixl, halae ngo Aezixr goxrjia gga bei dae mel dax zox dae a Aezixr goxrjia leil goxrsol-goxrnaxr lol ho a, nia leil hier teixl lei. ⁶ Ngo nia ddei porpor mel leil hier dae a Aezixr goxrjia gga ddux a, yaa dder neixvi nilni bbe dax ssi ci a; Aezixr su ca mel marcae nei mur zzaer su meixr mel leil hier dae a nia ddei porpor mel leil neixvi nilni bbe dax ggaxrmae ci a. ⁷ Nia ddei porpor mel Yihexrhuaxr leil qiuxr a, yar dder nia nei Aezixr su ca mel aga gga neixmar lol a; yoxl neixvi gga ajjix mel Aezixr su ca mel leil mil hex lol. Ngo Aezixr goxrjia gga bei dae hazza, nia malma mia goxr a. Giedae nia hierbolpae gga lei hormo koxl nei goxr a. ⁸ Ngo nia leil Yuedaxl lazzarmo ddei dofa piar a gga Yalmoxrlixl su ca mel goxr ggie middei

gga hier mal ci. Yaa nia dax zaxlddaexr, nael ngo yaa leil nia leixrga gga jia ji gger a, nia dder yaa ddei middei mel li wo a; ngo lei nia meixsaer qir leil yaa leil bei zil jjia gger a. ⁹ Halcar, Moxrya zzirmar Xibo ddei ssor Balexl Yirsaexllixl su ca mel leil ddaexr lei, halae ca leil miardal a Bir'aer ddei ssor Balaxr leil ae si lei a nia leil nr seir lol nia bbeix gger lol. ¹⁰ Nael ngo Balaxr ddei ddar no-nr-ni a, yel doxgoxleixr yar nia leil seir lol nia bbeix gger a. Eine nga a, ngo dder nia leil Balexl leixrga gga jiuxl teixl lei a. ¹¹ Nia Yuedaxl lazzarmo leil gger a, Yilixlge zzi gga ssi ci a. Yilixlge su ca, Yalmoxrlixl su ca, Birlixlsir su ca, Jianaxr su ca, Hexl su ca, Gexrjiasar su ca, Xiweixl su ca nei Yibuxlsi su ca mel lei nia dax zaxlddaexr; nael ngo yaa leil nia leixrga gga jia ji gger a. ¹² Ngo bbiurdu mel leil miardal a nia xilmeir bbiu dae lol a, Yalmoxrlixl su ca mel ddei zzirmar nrmel leil nia meixsaer qir leil ggaxr teixl gger a mel, ni ddei altor sser nr nga, ni ddei jir ddaexr labox lei sser nr nga. ¹³ Ngo nia leil gger dae middei mel, nia sulku a giexl teixl lei nr nga; ngo nia leil gger dae zzi mel, nia zi du lei nr nga. Eilcar nia halmaex hher dae a, nia armael dae teixl lei nr nga puxrto nei sarcor mel zzor,” eine bbeix a.

¹⁴ Yuesuyal yoxl bbeix: “Yel eilcar nia Yihexrhuaxr leil gexr nia, i du nia, seilseir a ddarzi mel dax zox a dae yar leil visser nia, nia ddei porpor mel halleix lazzarmo halpiar a gga nei Aezixr hher dae a visser dae kebal su ca mel zi dae mel leil piar pixl gger a, Yihexrhuaxr leil visser nia. ¹⁵ Nia zzirdae a Yihexrhuaxr leil visser a nr seir arddeirnga bbaexl, eilni dder arseir leil visser tiur ddo a: Nia ddei porpor mel lazzarmo halpiar a gga visser dae kebal ca mel zi dae mel leil visser? Bbeixsaer nia goxr ggie middei eilmaex gga Yalmoxrlixl su ca mel zi dae mel leil visser neil? Ngo nei ngo ddei ake ca hhexr nael, ngua arsae bei lei Yihexrhuaxr leil visser.”

¹⁶ Cassor-worssor mel ddarkoxl a bbeix: “Ngua arsae bei lei Yihexrhuaxr leil piar pixl gger a kebal ca mel zi dae mel leil visser ssi eine bei nr var! ¹⁷ Ngua ddei Arbosobo Yihexrhuaxr mel halleix ngua leil nei ngua ddei porpor mel leil Aezixr goxrjia gga zebol mu ggie hier teixl lei, ngua meixsaer qir leil murgurgurmo ddoddo-

mo hal mel bei, ngua ssi dae jjiimo mel gga, halae ngua ssi goxr circuxr-hanga gga lei ngua leil guaxr dae. ¹⁸ Yihexrhuaxr yoxl mi-ddei eil ddei gga goxr dae Yaxlmoxrlixl su ca mel leil ngua meixsaer qir leil ggaxr teixl gger. Yihexrhuaxr mel ngua ddei Arbosobo a, yel ngua arsae bei lei Yihexrhuaxr leil visser nia.”

¹⁹ Yuesuyal cassor-worssor mel leil bbeix: “Yihexrhuaxr mel seirceix-seirmaer Arbosobo a. Nia kebal su ca mel zi dae mel leil zi a, yar dder nixnox a, nia bei cox dae nei zuixl mel leil ssoxr-nr-suxl. Yel nia Yihexrhuaxr leil visser nr cexr. ²⁰ Nia Yihexrhuaxr leil piar pixl gger a kebal su ca mel zi dae mel leil visser ssi ar-ddeirnga a, Yihexrhuaxr nia leil seirseir meixl gger ho a lei, arsae bei lei za xixl lei a nr seir mel nia leil ddeix lol, nia leil bei zil jjia gger var.” ²¹ Cassor-worssor mel Yuesuyal leil ddarkoxl a bbeix: “Nr ssa! Ngua arsae bei lei Yihexrhuaxr leil visser nia.” ²² Yuesuyal cassor-worssor mel leil bbeix: “Nia armael leil weix a Yihexrhuaxr leil tiur a yar leil visser a mel, nia armael ddei zexlssexr bei ddor a!” Yaa ddarkoxl a bbeix: “Ngua zexlssexr bei yuex.” ²³ Yuesuyal bbeix: “Nia eilcar nia dax kebal su ca mel zi dae mel leil piar pixl gger nia, nixmox cirtaex-lorbba Yirsaexllixl su ddei Arbosobo Yihexrhuaxr dax mae nia.” ²⁴ Cassor-worssor mel Yuesuyal leil ddarkoxl a bbeix: “Ngua arsae bei lei ngua ddei Arbosobo Yihexrhuaxr leil visser, yar ddei ddar no.” ²⁵ Hal cir ni, Yuesuyal dder cassor-worssor mel dax bbeix har zaxr, Sixljixl mermi yaa leil miardal dae mel nei lixfaxr dixl gger. ²⁶ Yuesuyal ddar eilmel Arbosobo ddei lixfaxr sul ber leil vaexr deix gger, yoxl legelbbe vaervaer ar pir vei a Yihexrhuaxr ddei Sexlmuxl dax saexlzzei ar zzei woxrke dae ji gger a. ²⁷ Yuesuyal cassor-worssor mel leil bbeix: “I ddo a! Legelbbe eil pir niul ddei hoxltexr bei cexr; yar mel Yihexrhuaxr niul leil miardal dae ddar hazza noni wo a. Nia, nia ddei Arbosobo leil nr li arddeirnga a, legelbbe eil pir dder nia ddei hoxltexr bei cexr.” ²⁸ Yel Yuesuyal dder cassor-worssor cirddei-hanga leil miardal a, yaa armael bbe wo middei mel gga jjixr lol a.

Yuesuyal Nei Yirlixlyalsar Marle

²⁹ Eilmel goxr ho a, Yihexrhuaxr leil visser su Nexl ddei ssor Yuesuyal mel marle a; yar cirxiu cei koxl gol a. ³⁰ Yirsaexllixl su ca mel yar leil yar bbe wo middei gga giexlhex gger a; hherdder Yirfaxrlixr worga leil Tixrnaxrxila mermi Jiasixr worga baexrfa piar a gga nga a.

³¹ Yuesuyal gol dae seir nei Yuesuyal si ho a, Yihexrhuaxr Yirsaexllixl su ca mel leil ddoddomo cirke bei gger a saexl su, ca leil guaxr su camar hal mel gol dae seir car, Yirsaexllixl su ca mel Yihexrhuaxr leil visser.

³² Yirsaexllixl su ca mel Aezixr goxrjia gga vei teixl lei Yuesaexl ddei hherggar mel, Sixljixl mermi, hherdder Yargel halleix piu cirxiu pir sser a, Sixljixl yarbbor Hamoxl ddei giedae ca mel dax vae si lei mi hal bbae gga giexlhex gger a; middei eilmel dder Yuesaexl ddei giedae ca mel ddei loxr a.

³³ Yalluixr ddei ssor Yirlixlyalsar lei si a; yel dder yar leil yar ddei ssor Feinixrha bbe wo, Yirfaxrlixr wordabbor mermi gga worgassor leil giexlhex gger a.